

摘藻堂四庫全書薈要

史部

欽定四庫全書叢要

史部

通志卷五十

四

詳校官員外郎臣楊世綸



欽定四庫全書薈要卷八千九百五十三

史部

通志卷五十四

宋右迪功郎鄭樵漁仲撰

職官略第四

御史臺第六

御史之名周官有之蓋掌贊書而授法令非今任也戰國時亦有御史秦趙澠池之會各命書其事又淳于髡謂齊王曰御史在前則皆記事之職也至秦漢為糾察

之任秦以御史監郡漢初叔孫通新定禮儀以御史執法舉不如儀者輒引而去是也所居漢謂之御史府亦謂之御史大夫寺

漢御史大夫寺在大司馬門內無塾其門署用梓版不葺色題曰御史大

夫寺亦謂之憲臺成帝時御史府吏舍百餘區井水皆竭

又其府中列柏樹常有野鳥數千棲宿其上晨去暮來號曰朝夕烏烏去不來者數月長老異之後果廢御史大夫為大司空是其徵也後漢以來謂之御史臺亦謂

之蘭臺寺

顏師古曰官曹通名為寺應劭官儀曰廷尉案責上御史臺又謝靈運晉書曰漢尚書為

中臺御史為憲臺謁者為外臺是謂三臺後漢蔡邕時以侍御史轉治書御史遷尚書三日之間周遷三臺

梁及後魏北齊或謂之南臺

東魏時高澄用崔暹為御史中尉宋遊道為尚書左

丞謂之曰卿一人處南臺一人處北省當使天下肅然

後魏之制有公事百官朝

會名簿自尚書令僕以下悉送南臺

後魏臨洮王舉哀兼上尚書左僕射

元順不肯送名又不送簿中尉舉彈之順奏曰尚書百揆之本令僕納言之責不宜下隸中尉送名御史詔許之後元子思為御史中尉朔朝臺移尚書索應朝名帳尚書郎裴獻伯移生云按蔡氏漢儀御史中尉逢臺郎於複道中尉下避執版郎中車上舉手禮之以此而言明非敵體子思奏曰臣按漢書御史中丞為獨坐又按魏書曰崔琰為中丞百寮震恐則中丞不損省郎亦已久矣憲臺不屬都坐亦非今日又按孝文帝職令朝會

失時則御史彈之若不送名到否何驗獻伯等亂常變紀請付法詔曰國異政不可據以古事檢孝文帝舊格以聞尋從後周曰司憲屬秋官府隋及唐皆曰御史臺子思奏

龍朔二年改為憲臺咸亨元年復舊門北闕主陰殺也

按北齊楊楞伽鄴都故事云御史臺在宮闕西南其門北開取冬殺之義斯事久矣今東都臺門所以不北向者蓋欲變古之制或建造者不習故事耳唐龍朔中改司經局為桂坊置司直為東宮之憲府亦開北門以象御史臺其例明矣或云隋初移長安城造御史臺時有兵部尚書李員通檢校御史大夫欲於尚書省近故開北門此故御史為風霜之任彈糾不法百寮震恐官之說非也

雄峻莫之比焉舊制但聞風彈事提綱而已

舊例御史臺不受訴

訟有通辭狀者立於臺門候御史御史往門外收採如
可彈者略其姓名皆云風聞訪知唐永徽中崔義元為
大夫始定受事御史人知一日其鞫案禁繫則委之大
劾狀題告人姓名或訴訟之事

理貞觀末御史中丞李乾祐以囚自大理來往滋其姦
偽又按事入法多為大理所反乃奏於臺中置東西二
獄以自繫劾開元中大夫崔隱甫復奏罷之其後罕有
聞風彈舉之事多受辭訟推覆理盡然後彈之將有彈
奏則先牒監門禁止勿許其入

按宋書云二臺劾奏符
光祿加禁止不得入殿

省是其先例
光祿主殿門武太后時改御史臺為肅政臺凡置左右

肅政二臺別置大夫中丞各一人侍御史殿中監察各

二十人

又置肅政臺使六人尋罷之

左以察朝廷右以澄郡縣時議

以右多名流左多寒畯其遷登南省者右殆倍焉以其
不陵朝貴故也二臺迭相糾正而左加畏憚龍朔以後
去肅政之名但為左右御史臺初置兩臺每年春秋發
使春曰風俗秋曰廉察令地官尚書韋方質為條例刪
定為四十八條以察州縣廷載以後奉勅乃巡不每年
出使也睿宗即位詔二臺並察京師資位既等競為彈

紂百寮被察殆不堪命太極元年以尚書省悉隸左臺

月餘右臺復請分綰尚書西行事左臺大夫竇懷貞乃

表請依貞觀故事遂廢右臺而本御史臺官復舊廢臺

之官並隸焉大夫一人中丞二人侍御史四人殿中侍

御史六人監察御史十人主簿一人內供奉裏行者各

如正員之半

太宗朝始有裏行之名高宗時方置內供奉及裏行官皆非正官也開元初又置御

史裏使殿中裏使監察裏使等官並無定員義與裏行同穆思泰元光謙呂太一翟章並為裏使尋省建中三年九月御史臺請置推官一人其臺憲故事官資輕重常與本臺御史同推覆奉勅依

則杜易簡韓琬注記詳焉

杜易簡撰御史雜法四卷
韓琬撰御史臺記十二卷

御史大夫

中丞 侍御史
侍御史 主簿

殿中侍御史

監察

御史大夫

秦官侍御史之率故稱大夫漢因之位上卿
銀印青綬掌副丞相故事選郡守相高第為

御史大夫任職者為丞相成帝綬和元年更名大司空
成帝欲修辟雍通三公官故改御史大夫為大司空金
印紫綬秩比丞相哀帝建平二年朱博奏請罷大司空
以御史大夫為百僚帥帝從之遂復為御史大夫皆宰
相之任元壽二年復為大司空凡為御史大夫而丞相
次也其心冀幸丞相物故或乃陰私相毀害欲代之故
史記謂鄭弘為大夫守之數年不得匡衡居之未滿歲
而丞相死即代之後漢初廢御史大夫至建安十三年
罷三公官始復置之以郗慮居焉不領中丞置長史一
人魏黃初二年又改御史大夫為司空末年復有大夫

而吳有左右焉晉書曰魏以司空何曾為晉國丞相以王沈為御史大夫吳孫休以丁密益宗為左右御史大夫是也晉初省之此皆為三公非今御史大夫也今御史大夫即漢以來御史中丞是也後代或置大夫皆中丞之互名非漢舊大夫之任唯劉聰僭號置御史大夫亞於三公頗似漢制也

臣謹按漢舊儀拜御史大夫為丞相左右前後將軍贊五官中郎將授印拜御史大夫二千石贊左右郎將授印

中丞

初漢御史大夫有兩丞一曰御史丞一曰中丞亦謂中丞為御史中執法漢高帝詔徵賢良御史大

夫下相國相國下諸侯王御史中執法晉灼曰中執法中丞也中丞在殿中蘭臺有石室以藏祕書圖識之屬

以其在殿中故曰中丞外督部刺史內領侍御史十五員受公卿奏事舉劾按章蓋居殿中察舉非法也及御史大夫轉為大司空而中丞出外為御史臺率即隋唐御史大夫任也周官小宰之職掌建邦之宮刑以治王宮之政令凡宮之糾禁注曰若今御史中丞初御史大夫更名大司空置長史而中丞官職如故武帝時以中丞督司隸司隸督丞相丞相督司直司直督刺史刺史督二千石下至墨綬哀帝元壽二年御史中丞更名御史長史後漢光武復改為中丞兩梁冠銅印青綬與尚書令司隸校尉朝會皆專席而坐京師號為獨坐言其尊也凡中丞以下至侍御治書並文官屬少府魏初改中丞為宮正舉鮑勛為之百僚嚴憚後復為中丞晉亦因漢以中丞為臺主與司隸分督百僚自皇太子以下無所不糾初不得糾尚書後亦糾之從傅咸之奏也中丞專糾行馬內司隸專糾行馬外雖制如是然亦更奏衆官實無其限宋中丞一人每月二十五日繞行宮垣

白壁漢志執金吾每月一日繞行宮城疑是省金吾此事併中丞也銅印墨綬進賢兩梁冠佩水蒼玉介幘絳朝服孝武帝孝建二年制中丞與尚書令分道雖丞郎下朝相值亦得斷之餘內外衆官皆受停駐齊中丞職無不察專道而行騶輻禁呵加以聲色武將相逢輒致侵犯若有鹵簿至相毆擊梁國初建又置御史大夫天監元年復曰中丞中丞一人掌督司百僚皇太子其在宮門行馬內違法者皆糾彈之雖在行馬外而監司不糾亦得奏之專道而行逢尚書丞郎亦得停駐其尚書令僕御史中丞各給威儀十人自齊梁皆謂中丞為南司江淹為中丞齊明帝謂曰今君為南司足以震肅百僚也陳因梁制江左中丞雖亦一時髦彥然膏粱名士猶不樂王氏分枝居烏衣者為官微減僧虔為此官乃曰此是烏衣諸郎坐處我亦可試為耳後魏為御史中尉督司百僚其出入千步清道與皇太子分路王公百辟咸使避避其餘百僚下馬弛車止路傍其違緩者以

棒棒之其後洛陽令得與分道自東魏徙鄴無復此制
北齊高道穆為御史中丞武成帝姊壽陽公主犯清路
呵之不止道穆令卒棒破其車主泣訴於帝帝不責道
穆謂曰家姊行路相犯極以為愧後周有司憲中大夫
二人掌司寇之法辨國之五禁隋以國諱改中丞為大
夫唐因隋亦曰大夫龍朔二年改為大司憲咸亨初復
舊武太后改置左右肅政臺御史大夫各一人太極初
復舊掌肅清風俗彈糾內外總判臺事故事侍御史以
下與大夫抗禮光宅元年九月韋思謙除左肅政大夫
遂坐受拜其後大夫又與之抗禮至開元十八年有勅
申明隔品致敬其禮由之不改至二十四年六月李適
之為大夫又坐受拜後復與抗禮至後不改御史中丞
舊治書侍御史也初漢宣帝元鳳中感路溫舒尚德緩
刑之言季秋後請讞時帝幸宣室齋居而決事令侍御
史二人治書治書御史起於此也後因別置冠法冠有
印綬與符節郎共平廷尉奏事罪當輕重後漢亦二人

銅印青綾選明法律者為之蔡質漢儀曰選御史高第者補之凡天下諸獄疑事掌以法律當其是非自桓帝之後無所平理苟充其位而已魏置治書執法掌奏劾而治書侍御史掌律令二官俱置晉置四人泰始四年又置黃沙獄治書侍御史一人秩與中丞同掌詔獄及廷尉不當者皆理之後并江南遂省黃沙治書侍御史及太康中又省治書侍御史二員魏晉以來治書侍御史史分掌侍御史所掌諸曹若尚書二丞宋代掌舉劾齊梁並同皆統侍御史自宋齊以來此官不重自郎官轉治書者謂之南奔梁天監初始重其選車前依尚書二丞給三駟執盛印青囊舊事紀彈官印綾在前故也後魏掌糾禁內朝會失時服章違錯饗宴會見悉所監之北齊亦有焉後周有司憲上士二人亦其任也隋又為治書侍御史臺中簿領悉以主之唐永徽初高宗即位以國諱故改治書侍御史為御史中丞龍朔二年改為司憲大夫咸亨元年復為中丞二人亦時有內供奉職

副大夫通判臺事開元二十一年三月
置京畿都採訪處置使以中丞為之

臣謹按漢中丞故二千石為之或選侍御史高第執
憲中司出為二千石又按宋文帝元嘉十三年有司
奏御史中丞劉式之議每至出行未知制與何官分
道舊科法唯稱中丞專道傳詔荷詔信喚眾官應詔
者得行制令無分別他官之文皇太子不宜與眾同
例中丞應與分道揚州刺史丹陽尹建康令並是京
輦土地之主或檢校非違或赴救水火事應神速不

宜稽駐並合分道又尋六門則為行馬之內且禁衛
非違並由二衛及領軍既非郡縣界則京尹建康令
即不合依門外也又按後魏元志為洛陽令與中尉
李彪爭路俱入見彪曰御史中尉辟乘華羽蓋駐論
道劍鼓安有洛陽令與臣抗衡志曰臣神州縣主普
天之下誰非編民豈有俯同衆官趨避中尉孝文遂
令分路

侍御史

於周為柱下史老聃嘗為之以其在殿柱之間
故曰柱下史秦時張蒼為御史主柱下方書又

云蒼為柱下御史明習天下圖書計史籍一名柱後史冠曰法冠一名柱後惠文以鐵為柱言其審固不撓也法冠者秦始皇滅楚以其君冠賜御史亦名獬豸冠獬豸獸一角以觸邪故執法者冠之亦為侍御史漢因之凡十五員其舉郡國孝廉第四科云有能按章覆問文中御史惠帝三年相國奏遣御史以九條監三府不法事每三歲一更當十一月奏事三月還其後又置監御史漢官儀曰侍御史出督州郡盜賊運漕軍糧武帝時侍御史又有繡衣直指者出討姦猾理大獄訟觀覽風俗專行誅賞而不常置沈約云繡衣御史光武省順帝復置魏罷之後漢亦有侍御史員察舉非法受公卿羣吏奏事有違失舉劾之凡郊廟之祠及大朝會大封拜則一人監威儀有違失則劾奏以公府掾屬高第補之或故牧守議郎郎中為之唯德所在初上稱守滿歲拜真出劇為刺史二千石平遷補縣令見中丞執板揖順帝復絕他選專用宰士凡二漢侍御史所掌有五曹一

曰令曹掌律令二曰印曹掌刻印三曰供曹掌齋祀四曰尉馬曹掌廐馬五曰乘曹掌車駕豹尾之內便為禁省魏置八人所掌凡八部有治書曹課第曹其餘則闕當大會殿中御史簪白筆側階而坐曹侍御史九人頗用郡守為之品同持書而所掌有十三曹曰吏曹課第曹直事曹印曹中都督曹外都督曹媒曹符節曹水曹中壘曹營軍曹法曹算曹及江左初省課第曹置庫曹掌廐牧牛馬市租其後分庫曹置外左庫內左庫二曹宋代多并諸曹凡十人焉自漢以來皆朝服法冠齊亦置十人梁陳皆九人居曹糾察不法後魏御史八人其權甚重必以對策高第者補之侍御史與殿中侍御史畫則外臺受事夜則番直內臺御史舊式不隨臺主簡代延昌中王顯有寵於宣武為御史中尉始請革選此後踵其事每一中尉則更簡代御史北齊有八人亦重其選後周有司憲中士則其任也隋侍御史八人自開皇前猶踵後魏革選自開皇之後始自吏部選用不由臺

主仍依舊入直禁中大業中始罷御史直宿臺內文書
皆持書主之侍御史但侍從糾察而已由是資格少減
唐自貞觀初以法治天下尤重建言故御史復為雄要
其將除拜皆吏部與臺長官審判議定然後依選例補
奏其內詔別拜者不在其限麟德以來用人尤重選授
之命不由銓管及李義府掌大選寵任既重始得補之
自義府之後無出於吏部者舊御史遭長官於塗皆免
帽降乘長官戢轡辭而止焉乾封中王本立為侍御史
意氣頗高塗逢長官端揖而已自後諸人或降而立或
一足至地或側鞍弛韁輕重無常開元以來但舉鞭聳
揖而已侍御史凡四員內供奉二員掌糾察內外受制
出使分判臺事又分直朝堂與給事中中書舍人同受
表理冤訟迭知一日謂之三司受事其事有大者則詔
下尚書刑部御史臺大理寺同按之亦謂此為三司推
事後漢光武中詔御史寒朗共三府按楚獄亦此三司
之例也武太后時刑獄滋章凡二臺御史多苛刻無恩

以誅暴為事猜阻傾奪更相陵暴此其為弊也神龍以來稍革之其後名流慎選侔於貞觀永徽矣侍御史之職有四曰推掌推鞠曰彈掌彈舉曰公廨知公廨事曰雜事臺事悉判之凡殿中監察以下職事及進名改轉臺內之事悉主之號為臺端他人稱之曰端公其知雜事者謂之雜端最為雄劇食坐之南設橫榻謂之南牀殿中監察不得坐亦謂之癡牀言處其上者皆驕傲自得使人如癡故謂之癡牀

殿中侍御史

魏蘭臺遣侍御史居殿中察非法即殿中侍御史之始也晉置四人江左多置二人

梁有四人掌殿內禁衛內事後魏北齊皆有之隋初改曰殿內侍御史置十二人至煬帝省唐置六員內供奉二員初掌駕出於鹵簿內糾察非違餘同侍御史唯不判事咸亨以前遷轉及職事與侍御史相亞自開元初以來權歸侍御史而遷轉猶同兼知庫藏出納及宮門內事凡兩京城內則分左右巡各察知所巡之內有

不法事諸州諸衛兵禁隸焉彈舉違失號為副端閤門之外百寮班序有離立失列言譴而不肅者則糾罰之其正冬大會則戴玄纓乘馬加飾大夫中丞加金勒珂珮具服上殿供奉左右或闕則吏部以他官攝之其郊祀巡幸大備鹵簿出入由旌門者監其隊伍初武太后時有殿中裏行及員外殿中御史官或有起家為之而即真者神龍以來無監察則有裏行

監察侍御史

秦以御史監理諸郡謂之監察史漢罷其名至晉孝武太元中始置檢校御史以吳

混之為之掌行馬外事宋志云古司隸知行馬外事晉過江罷司隸官故置檢校御史專掌行馬外事宋齊以來無聞後魏太和末亦授此官宿直外臺不得入宿內省北齊檢校御史十二人後周司憲旅下士八人蓋亦其職隋開皇二年改檢校御史為監察御史凡十二人煬帝增置十六員掌出使檢校唐監察御史十員裏行

五員掌內外糾察并監祭祀及監諸軍出使等罪人當
答於朝者亦監之分為左右巡糾察違失以承天朱雀
街為界每月一代將時即巡刑部大理東西徒坊金吾
及縣獄若蒐狩則監圍察斷絕失禽者量宜劾奏開元
初革以殿中掌左右巡監察或權掌之非本任也職務
繁雜百司畏懼其選拜多自京畿縣尉又有監察御史
裏行者太宗置自馬周始馬始馬周以布衣有詔令於
監察御史裏行遂以為名後高宗時王立本自忻州定
襄縣尉為之凡裏行皆受俸於本官武太后時復有員
外監察試監察或有起家為之而即真者又有臺使八
人俸亦於本官請餘並同監察時人呼為六相吏部式
其試監察神龍以來無復員外及試但有裏行凡諸內
供奉及裏行其員數各居正官
之半唯俸祿有差職事與正同

臣謹按隋末亦遣御史監軍唐垂拱三年十一月鳳

閣侍郎韋方質奏言舊制有御史監軍武太后曰將
出師君授之以斧鉞閫外之事皆使裁之比來御史
監軍乃有控制軍中大小之事皆須承稟非所以委
專征也又按萬歲通天元年五月監察御史紀履忠
劾奏御史中丞來俊臣五罪長安四年三月監察御
史蕭至忠彈宰相蘇味道贓污貶官御史大夫李承
嘉常召諸御史責之曰近日彈事不咨大夫禮乎衆
不敢對至忠進曰故事臺中無長官御史人君耳目

比肩事主得各自彈事不相關白若先白大夫而許彈事如彈大夫不知白誰也承嘉默然憚其剛正又按景龍三年監察御史崔琬彈奏宰相宗楚客紀處訥等驕恣跋扈請收劾之舊制大臣有被御史彈者皆俯僂趨出待罪朝堂今楚客等瞋目作色稱以忠鯁被誣中宗令琬與楚客約為兄弟時人竊號為和事天子

主簿

漢有御史主簿張忠為御史大夫以孫寶為主簿是也魏晉以來無聞至隋大業三年御史臺始置

主簿二人兼置錄事二人唐置主簿一員掌印及受事
發辰勾檢稽失兼知官及黃卷其俸祿與殿中御史同
唐武德末杜淹為大夫以吏部主事林懷信為
之貞觀中自張弘濟為此官之後遂為美職

諸卿第七上

總論諸卿

少府附

夏制九卿

記曰夏后氏官百天子有三公九卿也亦有六卿商周皆然

商亦九卿

伊尹

曰三公調陰陽九卿通寒暑

周之九卿即少師少傅少保冢宰司徒

宗伯司馬司寇司空漢以太常光祿勳衛尉太僕廷尉

大鴻臚宗正司農少府謂之九寺大卿後漢九卿分屬

三司

太常光祿勳衛尉三卿並太尉所部太僕廷尉大鴻臚三卿並司徒所部宗正大司農少府三卿並

司空

多進為三公各有署曹掾史隨事為員九卿有疾

使者臨問加賜錢布

尚書令陳忠常欲褒崇大臣故奏建此禮

魏九卿名數

與漢皆同晉以太常等九卿

即漢九卿

兼將作大匠太后三

卿大長秋皆為列卿各置丞功曹主簿五官等員太康

四年增九卿禮秩

元帝以賀循為太常而散騎常侍如故循以九卿舊不加官唯拜太常而

已宋齊及梁初皆因舊

宋卿尹皆銀章青綬進賢兩梁冠佩水蒼玉衛尉則武冠晉服

制以九卿皆文冠乃進賢兩梁冠非舊也

梁武帝天監七年以太常卿加置

宗正卿以大司農為司農卿三卿是為春卿加置太府卿以少府為少府卿加置太僕卿三卿是為夏卿以衛尉為衛尉卿廷尉為廷尉卿將作大匠為大匠卿三卿是為秋卿以光祿勳為光祿卿大鴻臚為鴻臚卿都水使者為大舟卿三卿是為冬卿凡十二卿皆置丞及功曹主簿後魏又以太常光祿勳衛尉謂之三卿太僕廷尉大鴻臚宗正大司農少府為六卿各有少卿

太和十五年

置少卿官掌同大卿

北齊以太常光祿衛尉宗正太僕大理鴻臚

司農太府為九寺

晉荀勗曰九寺可併於尚書後魏亦有
三府九寺則九卿稱寺久矣然通

其名不連官號其官
寺連稱自北齊始也

置卿少卿丞各一人各有功曹五

官主簿錄事等員隋九寺與北齊同

自晉三代以上分
置六卿比周百事

至秦及漢雖事不師古猶制度未繁後漢有三公九卿
而尚書之任又益重矣魏晉以降職制日增後周依周
禮置六官而年代短促人情相習已久不能革其視聽
故隋氏復廢六官多依北齊之制官職重設庶務煩滯
加六尚書似周之六卿又更別立寺監則戶部與太府
分地官司徒職事禮部與太常分春官宗伯職事刑部
與大理分秋官司寇職事工部與將作分冬官司空煬
職事自餘百司之任多類於斯欲求理要實在簡省
帝降光祿以下八寺卿階品於太常而少卿各置二人

始開皇中諸司寺唯典掌受納至煬帝署令唐九寺與
為判首取二卿同判丞唯知檢局令闕丞判

北齊同卿各一人少卿各二人丞以下有差龍朔二年

改九寺之名凡卿皆加正若太常卿為奉常後各復舊

太常卿

丞

主簿

博士

太祝

奉禮郎

協

律郎

兩京郊社

太樂

鼓吹

太醫

太卜

廩犧

汾祠

太公廟

太常卿

秦曰奉常漢初曰太常顏師古曰太常者王之
旌也畫日月焉王者有大事則建以行禮官主

奉持之故曰奉常後改為太尊大之義也惠帝更名奉
常景帝六年更名太常後漢秩與漢同每祭祀前奏其
禮儀及行事贊天子每選試博士奏其能否大射養老
大喪皆奏其儀每月前晦察行陵廟助祭則平冕七旒

漢舊制以列侯忠孝敬慎者居之後漢不必侯也舊制陵縣悉屬歲舉孝廉後漢則否建安中為奉常魏黃初元年改為太常魏晉改銀章青綬進賢兩梁冠絳朝服佩水蒼玉宋齊皆有之舊用列曹尚書多選曹尚書領護梁視金紫光祿大夫陳固之後魏為上卿兼置小卿官周禮有小宗伯中大夫二人即其任也北齊曰太常寺置卿及少卿丞各一人掌陵廟羣祀禮樂儀制天文術數衣冠之屬後周建六官置大宗伯卿一人是為春官隋曰太常與北齊同煬帝加置少卿二人唐因之龍朔二年改太常為奉常咸亨元年復舊光宅元年改太常為司禮神龍初復舊卿一人掌禮儀祭祀總判寺事少卿二人通判領丞一人主簿二人博士四人太祝三人奉禮郎協律郎各二人齊郎五百五十二人其餘小吏各有差郊社太公廟太樂鼓吹太醫太卜廩犧等署各有令其郊社及太公廟兩京皆有之

丞

秦置一人漢多以博士議郎為之後漢凡諸丞皆掌行禮及祭祀小事總署曹事舉廟中非法皆銅印墨綬進賢兩梁冠歷代皆有梁舊用員外郎遷尚書郎天監七年改視尚書郎陳因之後魏北齊亦有之隋有二

人唐因之分判寺

事餘寺丞職並同

主簿

漢有之漢鹵簿之制太常駕四馬主簿前車八乘魏晉亦有焉梁天監七年十二卿各置主簿一人

惟太常主簿視二衛主簿陳因之北齊有功曹五官主簿二人唐二人掌付事勾稽省署抄日監印給紙筆等事餘寺主

等並同職

博士

魏官也魏文帝初置晉因之掌引導乘輿王公以下應追謚者則博士議定之端委佩玉朝之大典

必於詢度歷代皆有隋有四人唐因之甚為清選資位與補闕同掌撰五禮儀注導引乘輿贊相祭祀定誅謚

及守祧廟開閉塹室及祥瑞之事

太祝

商官與太宰等官為六太周官太祝下大夫二人上士四人掌六祝之辭以祈福祥秦漢有太祝令

丞後漢太祝令一人六百石丞二人晉宋齊梁陳後魏北齊皆因之後周依周官至隋置太祝署太祝令丞煬帝罷署太祝八人唐初有七人後增為九人開元二十三年減置三人掌讀祝文出納神主

奉禮郎

漢大鴻臚有治禮郎四十七人晉博士有治禮郎四人屬大行令後魏有治禮郎四人北齊有

奉禮郎三十人屬鴻臚寺之司儀署後周有治禮中士下士各一人隋有奉禮郎一十六人屬太常寺煬帝減置六人唐武德初有治禮郎四人掌設版位執儀行事至永徽二年以犯廟諱改為奉禮郎開元二十三年減

員二

協律郎

漢曰協律都尉李延年為之武帝以延年善新聲故為此官後漢亦有之魏以杜夔為之魏武

平荊州得夔以知音識舊樂故使為此官晉改為協律校尉後魏有協律郎又有協律中郎北齊及隋協律郎皆二人唐因之掌舉麾節樂調和律呂監試樂人典課

兩京郊社令

周官有典祀掌以時祭祀秦漢有太祝令丞屬奉常景帝改為祠祀武帝更曰廟祀

後漢祠祀屬少府魏晉有太祝令丞宋曰明堂令丞掌祀五帝之事齊有太祝及明堂二令梁有明堂太社二令並屬太常北齊太廟令兼領郊祀崇虛二丞郊祀掌五郊崇虛掌五嶽四瀆後周有司郊上士中士司社中士下士隋太常寺置郊社令丞各一人唐因之掌郊社明堂祠祀祈禱及茅土衣冠等事

太樂令

周官有大司樂掌成均之法亦謂之樂尹以樂舞教國子左傳楚鍾建為樂尹即大司樂也秦

漢奉常屬官有太樂令及丞又少府屬官并有樂府令丞後漢永平三年改太樂為大予樂令掌伎樂人凡國祭饗掌諸奏樂魏復曰太樂令丞晉亦有之齊銅印墨綬進賢一梁冠絳朝服梁陳因之後魏置太樂博士北齊曰太樂令丞後周有大司樂掌成均之法後改為樂部有上士中士隋有太樂令丞各一人唐因之掌習音

樂樂人簿籍

臣謹按盧植禮注云太樂令如古大胥漢太樂律卑者之子不得舞宗廟之酎除吏二千石到六百石及關內侯到五大夫子取適子高五尺以上年十二到三十顏色和順身體循理者以為舞人

鼓吹令

周禮有鼓人掌六鼓四金之音後漢有承華令典黃門鼓吹屬少府晉置鼓吹令丞屬太常元帝省太樂并鼓吹哀帝復省鼓吹而存太樂梁有鼓吹令丞又有清商署比齊鼓吹令丞及清商部並屬太常隋有鼓吹清商二令丞至煬帝罷清商署唐鼓吹署令丞各一人所掌頗與太樂同

太醫令

周官有醫師上士下士掌醫之政令秦兩漢有太醫令丞主醫藥屬少府後漢又有藥丞有醫工長魏因之晉銅印墨綬進賢一梁冠絳朝服而屬宗正遇江省宗正而屬門下省宋齊隸侍中梁陳因之後魏有太醫博士助教比齊又曰太醫令丞後周太醫下大夫隋有太醫署令二人唐因之主醫藥凡領醫針灸按摩呪禁各有博士

臣謹按唐武德中關中多骨蒸病得之必死遞相傳

染許允宗每療皆愈或謂曰何不著書以貽將來答
曰醫乃意也在人思慮有脉候幽微苦其難別意之
所解口莫能宣求之名手唯是別脉然後識病病之
於藥有正相當者唯須單用一味直攻彼病立即可
愈今人不能別脉莫識病源以情意度多用藥味譬
之於獵不知兔處多發人馬空廣遮圍或冀一兔偶
然逢也如此療病不亦疎乎既不可言故無著述

太卜令

商官太卜為六太周官太卜掌三兆之法秦漢
有太卜令後漢并于太史自後無聞後魏有卜

博士北齊有太卜局丞後周有太卜大夫小卜上士龜占中士隋曰太卜令丞一人唐因之

廩犧令

周禮有牧人掌牧六牲以供祭祀秦漢內史左馮翊廩犧令丞並掌犧牲鴈鶩後屬大司農後

漢河南尹屬官有廩犧丞魏晉宋齊梁陳後魏北齊隋皆有之唐令丞各一人掌犧牲梁盛之事

汾祠及齊太公廟

並有令丞各一人唐開元中置掌享祀灑掃之事

光祿卿

丞主簿掌醢署

太官署

珍羞署

良醢署

光祿卿

秦有郎中令以主郎內諸官故曰郎中令掌宮殿掖門戶漢因之至武帝太初元年更名光祿

勲胡廣曰勲猶闔也主宮殿門故也王莽改光祿勲為司中後漢曰光祿勲所掌同典三署郎更直執戟宿衛門戶考其德行而進退之郊祀之事掌三獻光祿勲居禁中有獄在殿門外謂之光祿外部兩漢自光祿太中

中散諫議等大夫及謁者僕射羽林郎郎中侍郎五官
虎賁左右等中郎將奉車駙馬二都尉車戶騎三將並
屬光祿勳建安末復改光祿勳為郎中令魏黃初元年
復為光祿勳東晉哀帝興寧三年省光祿勳併司徒孝
武寧康元年復置自魏晉以後無復三署郎而光祿不
復居禁中唯外官朝會則以名到焉二臺奏劾則符光
祿加禁止亦如之謂禁入殿省也其宮殿門戶至宋文
猶屬焉梁除勳字謂之光祿卿卿舊視刊曹尚書天監
中視中庶子職與漢同後魏又置少卿北齊曰光祿寺
置卿少卿兼掌諸膳食帳幕隋文帝開皇三年廢光祿
寺入司農十二年復置初有卿及少卿各一人煬帝加
置二少卿唐龍朔二年改光祿寺為司宰寺咸亨初復
舊光宅元年為司膳神龍初復舊卿一人掌終獻行事
少卿二人領太官珍羞良醢掌醢等四署署各有令丞

臣謹按漢東京三署郎有德應四科者歲舉茂才二

人四行二人及三署郎罷省光祿勳猶依舊舉四行
衣冠子弟以充之又按張湛拜光祿勳光武臨朝或
有惰容湛輒陳諫其失嘗乘白馬上後見湛輒曰白
馬生且復諫矣又杜林為光祿勳內供奉宿衛外總
三署周密謹慎選舉稱平郎有好學者輒見誘進朝
夕滿堂士以此高而慕附又荀爽為光祿勳視事三
日冊拜司空

丞

漢二人多以博士議郎為之後漢一人魏晉因之銅
印黃綬梁陳視員外郎後魏北齊並有之隋有三人

唐置
二人

主簿

漢置晉宋齊梁陳並有之北齊曰功曹五官主簿隋二人唐因之

太官令丞

於周官為膳夫庖人外饗中士下士蓋其任也秦為太官令丞屬少府兩漢因之桓帝延

熹元年使太官令得補二千石魏亦屬少府晉屬光祿勳宋齊屬侍中梁門下省領太官陳因之後魏分太官為尚食中尚食知御膳隸門下省而太官掌百官之饌屬光祿卿北齊因之後周有典庖中士內膳中士隋如北齊唐因之各一人

珍羞令丞

於周官有籩人掌四籩之實後漢少府屬官有甘丞主膳具晉太官令有飭官果官自後

無聞北齊餽藏令屬光祿寺後周有餽藏中士下士隋如北齊唐因之長安中改為珍羞神龍初復舊開元初

又改之有令丞各一人

良醞令丞

於周官有酒正中士下士掌酒之政令後漢湯官丞主酒及餅餌屬少府晉有酒丞一人

齊食官局有酒吏梁曰酒庫丞北齊有清漳令丞主酒後周如古周之制隋曰良醞令丞各一人唐因之

掌醞令丞

於周官有醞人掌四豆之實自後無聞至齊諸公府有釀食典庫二人後周有掌醞中士

下士隋曰掌醞令丞各一人唐因之

衛尉卿

丞

主簿

武庫署

武器署

守宮署

公車司馬

左右都候

衛尉卿

秦官有衛尉掌門衛屯兵漢因之漢舊儀曰衛尉寺在宮內胡廣云主宮闕之內衛士於周垣

下為區廬區廬者若今之仗宿屋景帝初更名中大夫令後元年復為衛尉又有長樂建章甘泉衛尉皆掌其宮其

職略同而不常置後漢有衛尉卿一人職與漢同晉銀
章青綬五時朝服武冠佩水蒼玉掌諸治江左省衛尉
宋孝武復置南齊掌宮城管鑰以警夜梁衛尉卿位視
侍中職與漢同卿每月丞每旬行宮微糾察不法陳因
之後魏亦有之北齊為衛尉寺有卿及少卿各一人隋
文帝開皇三年廢衛尉寺入太常及尚書省十三年復
置掌軍器儀仗帳幕之事而以監門衛掌宮門屯兵唐
因之龍朔二年改衛尉為司衛咸亨初復舊光宅二年
又改為司衛神龍初復舊卿一人少卿
一人領武庫武器守宮三署署各有令

丞秦漢多以博士議郎為之後漢一人魏晉並同宋孝
武增置一人梁亦有之後魏北齊並有隋因之唐置

二人

主簿

一人漢衛尉駕四馬主簿前車以乘晉有衛尉主
簿二人宋齊梁陳因之北齊隋亦有二人唐因之

武庫令丞

於周官司甲司弓矢等下大夫司戈盾等中士下士蓋其任也兩漢曰武庫令屬執金吾

後漢又有考工令丞屬太僕主造兵器成則付武庫令魏晉因之晉後屬衛尉宋齊武庫令丞屬尚書庫部梁陳屬衛尉卿北齊亦有後周如周官隋如北齊唐因之各一人掌藏天下之兵仗器械

武器令丞

隋行臺尚書省有武器監令唐永徽中始置各一人掌祭祀及朝會巡幸及公卿拜命與

具婚葬國
簿之事

守宮令

漢有守宮令丞掌御紙筆墨及諸財用并封泥之事屬少府晉及北齊屬光祿勳北齊守宮令

掌張設之事梁陳屬大匠卿隋屬衛尉寺唐置令一人掌諸鋪設帳幕氍毹褥牀薦几席之事

臣謹按唐廣德二年二月敕文京兆府諸司諸使幕

士丁匠總八萬四千五百人數內宜月支二千九百四十四人仍令河東關內諸州府據戶口分配不得偏出京兆府餘八萬一千一百十四人並停

公車司馬令

秦屬衛尉漢因之掌殿司馬門夜徼宮中天下上章四方貢獻及闕下凡所徵詣公車者皆總領之後漢有丞一人丞選曉諱掌知非法尉主關門兵禁戒非常晉江左以來直曰公車令宋以後屬侍中隋有公車署置令丞唐無

臣謹按漢張釋之為公車令時景帝為太子與梁王共車入朝不下司馬門釋之遂劾其不敬文帝免冠

謝太后太后詔赦之然後得入

左右都候

後漢各一人主劍戟士徵循宮及天子有所收考屬衛尉後無

宗正卿

丞

主簿

崇元署

諸陵署

太廟署

宗正卿

周官小宗伯掌三族之別以辨其親疎秦置宗正掌親屬漢因之更以叙九族平帝元始四年

更名宗伯五年又於郡國置宗師以糾皇室親族世氏致教訓焉選有德義者為之有寃失職者宗師得因郵亭上書宗伯請以聞常以正月賜宗伯帛十疋王莽併宗伯於秩宗後漢曰宗正卿一人掌序錄王國嫡庶之次及諸皇室親屬遠近郡國歲因計上皇族名籍若有犯法當髡以上先上諸宗正宗正以聞乃報決胡廣曰宗正又歲一理諸王世譜差叙秩第兩漢皆以皇族為之不以他族故楚元王子郢客劉辟疆劉德等迭為此

官又後漢劉軫梁孝王之裔皆宗正卒官遂世掌焉魏
亦然晉兼以庶姓故山公啟事曰羊祜忠篤寬厚然不
長理劇宗正卿缺不審可轉作否咸寧三年又置宗師
以扶風王亮為之使皇室戚屬奉率忠義所有施行必
令詰之東晉省屬太常宋齊不置宗正梁天監七年復
置之視列曹尚書主皇室外戚之屬以皇族為之陳因
之後魏有宗正卿少卿北齊亦然後周有宗師中大夫
屬大冢宰隋如北齊之制唐龍朔二年改為司宗咸亨
元年復舊光宅元年改為司屬神龍初復舊卿一人少
卿二人掌皇族外戚簿籍及邑司名帳領宗元署及諸
陵太廟開元二十五年制宗
正等寺官屬皆以皇族為之

丞

漢亦用皇族後漢一人歷代
皆有之至隋有二人唐因之

主簿

梁置陳北齊隋皆
有唐因之置一人

崇元署

令一人後魏天興二年置仙人博士掌煮煉百藥北齊置昭元等寺掌諸佛教有大統一人都

維那三人兼置功曹主簿等員以管諸州縣沙門之法後周置司寂上士中士掌法門之政又置司元中士下士掌道門之政隋初置崇元署令丞至煬帝改郡縣佛寺為道場置道場監一人改觀為元壇監一人唐復置崇元署初又每寺觀各置監一人屬鴻臚貞觀中省開元中以崇元署隸宗正寺掌觀及道士女冠簿籍齋醮之事

諸陵

漢有諸陵園寢官屬太常元帝永光元年分諸陵邑屬三輔故史記曰司馬相如為孝文園令後漢

每陵園令各一人掌按行埽除丞及校長各一人校長主兵戎盜賊晉宋皆曰令而梁初則為監後亦改為令梁以下皆有之唐每陵令丞各一人初屬太常開元二十五年並屬宗正寺

臣謹按漢長陵令秩二千石為高祖陵也故尊其秩

太廟令

漢有諸廟寢園令長丞宋志曰漢西京曰長東京曰今晉有太廟令宋太廟令領齋郎二十四

人齊梁以下皆有舊屬太常唐開元二十五年二月勅宗廟所奉尊敬之極因以名署情所未安宜令禮官詳擇所宜奏聞至五月太常少卿韋縚奏曰謹按經典兼尋令式宗廟享薦皆主奉常別置署司事非稽古其太廟署請廢省本司專奉其事許之二十五年勅宗正設官實司屬籍而陵寢崇敬宗廟惟嚴割隸太常殊乖本系奉先之旨深所未安自今已後諸廟署並隸宗正寺也

臣謹按後魏有太常齋郎漢書曰田千秋為高廟寢

郎

太僕卿

丞

主簿

乘黃署

典廄署

典牧署

車府署

諸牧署

太僕卿

周官有太僕下大夫掌正王之服位出入王之

大命如今太僕之職一云周穆王置太僕正以

伯冏為之掌輿馬秦因之在周官則校人掌馬中車掌車及置太僕兼其事也漢初夏侯嬰常為之高祖為沛公時嬰為太僕至文帝時猶居其職領五監六廄皆有令王莽改太僕為太御後漢太僕與漢同亦掌車馬天子每出奏駕上鹵簿用大駕則執馭是時約省惟置一廄魏因之晉初有之銀章青綬五時朝服進賢兩梁冠佩水蒼玉領典牧乘黃驊龍馬等廄令自元帝過江之後或置或省太僕既省故驛驢廄為門下之職晉宋以來不常置郊祀則權置太僕執轡事畢則省齊亦然梁太僕卿位視黃門侍郎統南牧左右牧龍廄內外廄陳因之後魏兼置少卿北齊太僕寺統驛驢左右龍廄左右馳牛羊司乘黃車府典牧牛羊等署卿及少卿各

一人後周如古周隋如北齊煬帝加置少卿一人唐龍朔二年改太僕為司馭咸亨初復舊光宅元年改為司僕神龍初復舊卿一人掌馭五輅少卿本一員景雲元年加一員領乘黃典殿典牧車府等四署署各有令天下監牧置八使五十六監

臣謹按漢武帝承文景蓄積海內繁富廐馬有四十萬匹時匈奴數寇邊遣衛青霍去病發十萬騎并負私從馬凡十四萬匹窮追大破匈奴漢馬死者十餘萬匹匈奴雖病遠去而漢亦馬少無以復往又按後魏太武帝平統萬赫連昌定隴右羌沮渠等河西水

草善乃以為牧地六畜滋息馬三百餘萬匹駝駝將半之牛則無數孝文帝遷洛陽之後復以河陽為牧場常置戎馬十萬匹以擬京師軍警之備每歲自河西徙牧於并州漸南欲其習水土無死傷也而河西之牧滋甚又按唐貞觀初僅有牧牝三千匹從赤岸澤徙之隴右十五年始令太僕卿張萬歲幹羣牧至麟德四十年間馬至七十萬六千匹置八使領六監初置四十八監跨蘭渭秦原四州之地猶為隘狹更

增八監布於河曲其時天下以一縑易一馬儀鳳三年少卿李思文檢校隴右諸牧監方稱使爾後或戎狄外侵牧圉乖散洎乎垂拱潛耗大半開元初牧馬二十四萬匹十三年加至四十五萬匹初有牛三萬五千頭是年亦五萬頭初有羊十一萬二千口是年亦二十萬六口盛於垂拱

丞秦漢有兩人後漢一人魏晉因之東晉或省或置梁有丞陳因之後魏北齊丞一人隋三人唐因之掌判寺事凡補獸醫業優

長者進以為博士

主簿

梁置一人北齊亦一人隋二人唐因之

乘黃令

後漢太僕有未央廐令魏改為乘黃廐乘黃古之神馬因以為名晉以下因之宋屬太常銅印

墨綬進賢一梁冠絳朝服歷代皆有悉掌乘輿唐令丞各一人掌乘輿車輅

典廐令

周官有牧人圉師趣馬掌十二閑之馬漢西京太僕有龍馬長東京有未央廐令掌乘輿及宮

中之馬魏為驊駘廐晉有驊駘龍馬二廐自宋以後分驊駘廐屬門下梁太僕有龍廐及內外等廐陳因之北齊有驊駘左右龍等署後周有左右廐各上士一人隋如北齊唐改龍廐為典廐署令二人丞四人掌在廐繫飼馬牛及雜畜事

典牧監

周官牧師下士四人掌牧馬而頒之秦漢邊郡置六牧師令魏晉以下因之隋有典牧牛羊等

監各置令丞唐有乘黃等四監令丞各四人掌外牧及造酥酪脯腊之事

車府令

秦以趙高為之歷代皆有漢魏屬太僕宋齊以後屬尚書駕部北齊以下又屬太僕唐置令丞

各一人掌王

公以下車輅

諸牧監

漢太僕有牧師諸苑三十六所在北邊西邊以郎為苑監官魏置牧官都尉晉因之自後無間

北齊有左右牝牡駝牛羊等署令後周曰典牝典牡上士中士又有典駝典羊典牛中士隋曰典牧署牛羊署令丞唐初因之分曰牧監置監副監丞主簿

大理卿

正

丞

主簿

獄丞

司直

評事

大理卿

舜攝帝位皋繇作士正五刑孔安國曰士理也成周則秋官之任也韓詩外傳曰晉文公使李

離為大理過聽殺人自拘於廷遂伏劍死君子曰忠與仁故後世為之李官秦為廷尉漢因之掌刑辟景帝以中元六年更名大理武帝建元四年復為廷尉哀帝元壽二年復為大理後漢廷尉卿凡郡國讞疑皆處當以報多以世家為之而郭氏尤盛郭躬為廷尉家世掌法務在寬平躬乃條諸重文可從輕者四十一事奏之事皆施行著于令建安中復為大理黃初元年改為廷尉鍾毓為廷尉聽君父亡歿臣子得為理謗及士為侯其妻不復改嫁毓所制也歷代皆為廷尉梁國初建曰大理天監元年復改為廷尉舊用黃門後視祕書監有正監平三人元會廷尉三官與建康三官皆法冠玄衣朝服以監東西中華門手執方木長三尺一寸謂之執方天監元年詔建康獄依廷尉三官置正監平革選士流視給事中以尚書郎出為之冠服與廷尉三官同陳因之後魏亦曰廷尉北齊曰大理寺置卿少卿各一人後周有刑部中大夫掌五刑之法附萬民之罪屬大司寇

隋初與北齊同至煬帝加置少卿二人唐龍朔二年改大理為詳刑咸亨元年復舊光宅元年改為司刑神龍元年復舊卿一人掌鞠獄定刑名決諸疑讞少卿二人正二人丞六人主簿二人錄事二人獄丞四人司直六人評事十二人

臣謹按隋文帝時議置六卿將除大理盧思道奏曰省有駕部寺留太僕省有刑部寺除大理斯則重畜產而賤刑名也

正秦置廷尉正漢因之後漢一人魏謂正監平為廷尉三官晉廷尉三官通視南臺持書舊尚書郎下遷梁制服獬豸冠介幘皂衣銅印墨綬歷代皆有隋開皇三年增為四員煬帝增為六員唐二人通判寺事龍朔二

年改為詳刑大夫咸亨初復舊

臣謹按魏司馬芝為大理正有盜官練置都厠上者吏疑女工收以付獄芝曰贓物先得而後訊其辭若不勝掠或至誣服誣服之情不可以折獄且簡而易從大人之化也不失有罪庸世之理耳魏武從之

丞自晉武咸寧中曹志上表請廷尉置丞宋齊梁並因之後魏亦然北齊曰大理丞一人隋初二人至煬帝改為勾檢官增為十六人分判獄事唐又曰丞置六人

臣謹按唐杜正倫徐有功並為司刑丞與來俊臣侯

思止同制獄人稱之曰遇徐杜必生遇來侯必死

主簿

自魏晉宋齊梁陳皆有唐置二人

獄丞

晉有左右丞各一人宋齊因之梁陳置二人後魏北齊亦然隋有獄掾八人唐曰丞有四人

司直

後魏永安二年置司直十人御史中尉高穆所請也視五品隸廷尉位在正監上不署曹事唯覆理

御史檢劾事北齊隋因之隋初置十人煬帝置十六人唐置六人掌承制出使推覆若寺有疑獄則參議之

評事

漢宣帝地節三年初於廷尉置左右平員四人宣帝詔曰今遣廷吏與郡鞠獄任輕祿薄其為置正

平員四人其務平之涿郡太守鄭昌上言曰聖王立法明刑者非以為治救衰亂之起也今明主躬垂明聽不置廷平獄將自正若開後嗣不若刪定律令律令壹定愚民知所避就姦吏無所弄法令不正其本而置廷平

以理其末世哀聽怠則廷平將搖權而為亂首也後漢光武省右平唯有左平一人掌平決詔獄冠法冠魏晉以來無左右而直謂之廷尉評後魏北齊及隋廷尉評各一人開皇三年罷至煬帝乃置評事四十八人掌與司直同其後官廢唐貞觀二十二年諸遂良議重法官復奏置評事十員掌出使推覆後加二人為十二員監泰置廷尉監漢有左右監酈吉為廷尉監光武省右監唯有左監一人魏晉以來無左右而直云廷尉監隋開皇三年罷大理監

諸卿第七中

鴻臚卿

丞

主簿

典客署

司儀署

鴻臚卿

周官大行人掌大賓客之禮秦官有典客掌諸侯及歸義蠻夷史記曰韓信亡楚歸漢為連敖

徐廣注云連教典客漢改為鴻臚應劭曰郊廟行禮贊導九賓鴻臚聲也臚傳也所以傳聲贊導故曰鴻臚景帝二年令諸侯王薨列侯初封及之國大鴻臚奏謚誄策列侯薨及諸侯太傅初除之官大行奏謚誄策周禮有大行人小行人主謚官故以名之建中六年改大鴻臚為大行令武帝太初元年更名大鴻臚又更名其屬官行人為大行令其屬官又有郡邸長丞主諸郡之邸在京師者至後漢省但令郎治郡邸秦時又有典屬國官掌蠻夷降者漢因之成帝河平元年省之併大鴻臚後漢大鴻臚卿一人諸王入朝當郊迎典其禮儀及郡國上計餘職與漢同凡皇子拜王贊授印綬及拜諸侯諸侯嗣子及四方夷狄封者臺下鴻臚召拜之王薨則使使弔之及拜王嗣魏及晉初皆有之自東晉至于宋齊有事則權置兼官畢則省梁除大字但曰鴻臚卿位視尚書左丞常導護贊拜後魏曰大鴻臚北齊曰鴻臚寺有卿少卿各一人亦掌蕃客朝及吉凶弔祭後周司寇

有蕃部中大夫掌諸侯朝覲之叙有賓部中大夫掌大
賓客之儀隋文帝開皇三年廢鴻臚寺入太常十二年
復置領典客司儀崇元三署至煬帝置少卿二人唐龍
朔二年改鴻臚為同文咸亨初復舊光宅初改為司賓
神龍初復舊卿一人掌賓客凶儀之事及冊諸蕃少卿
本一員景雲二年加一員領典客司儀二署署各有令
丞秦曰典客丞漢為鴻臚丞魏晉亦然王敦為鴻臚卿
謂阮修曰卿常無食鴻臚差有祿能作否修遂為丞
梁陳後魏北齊皆有之後周曰賓
部上士隋如北齊唐因之有二人

主簿

一人

典客

周官有掌客上士中士秦官有典客漢改為鴻臚
鴻臚屬官有大行令丞本名行人武帝改為大行

令丞魏改大行令為客館令晉改為典客宋分置南北
客館令齊梁陳皆有客館令丞後魏初曰典客監太和

中置主客令北齊有典客署後周置東南西北四掌客
上士下士隋初又曰典客署置令丞煬帝改為典藩署
唐為典客署置令丞各一人掌二王
後蕃客辭見宴接送迎及在國夷狄
司儀 周官有司儀上士中士漢大鴻臚有治禮郎自後
員隋如北齊唐因之置令丞各
一人掌凶事儀式及喪葬之事

司農卿

丞

主簿

上林署

太倉署

鈎盾署

導官署

苑總監

諸倉監

司竹監

溫泉湯監

諸屯監

驛粟都尉

均輸令

幹官長

籍田令

典農中郎將等官

司農卿

少皞氏以九鴈為九農正舜攝帝位命棄為后
稷周則為太府下大夫秦為治粟內史掌穀貨

漢景帝更名大農令武帝太初初更名大司農掌九穀
六畜之供膳羞者凡郡國諸倉農監都水六十五官皆

屬焉王莽改曰義和後更為納言後漢大司農掌諸錢穀金帛郡國四時上月旦見錢穀簿其逋未畢各具別之邊郡諸官請調度者皆為給報損多益寡取相給足初郡國鹽官鐵官並屬司農中興皆屬郡縣建安中為大農魏黃初元年又改為司農晉初因之渡江哀帝末省司農并都水孝武復置宋齊皆有之梁司農卿位視散騎常侍主農功倉廩陳因之後魏曰大司農北齊曰司農寺有卿少卿各一人掌倉市新米園池果實後周有司農上士一人掌三農九穀稼穡之政令屬大司徒隋初與北齊同煬帝置少卿二人潁川太守趙元淑入朝會司農不時納諸郡租穀元淑奏之煬帝曰如卿意者幾時當了元淑曰不過十日即日拜元淑為司農卿納天下租如言而畢唐龍朔二年改司農為司稼咸亨初復舊卿一人少卿二人掌東耕供進耒耜及邦國倉儲之事領上林太倉鈎盾導官四署署各有令丞

丞

秦曰治粟內史丞有二人漢為大司農丞二人或謂之中丞耿壽昌為大司農中丞奏訖設常平倉給北

邊省轉漕又桑弘羊為大司農中丞管諸計會事平帝又置大司農部丞十三人人部一州勸農桑後漢司農丞一人部丞一人部丞主帑藏魏晉因之銅印黃綬宋齊以來墨綬進賢一梁冠介幘皂衣後魏北齊皆有司農丞隋置五人唐六人

主簿

晉太康中置自後無聞梁陳又有北齊亦然唐因之

上林署

漢水衡都尉之職後漢曰上林苑令丞主苑中禽獸魏晉因之江左無聞宋初復置隸尚書殿

中曹齊因之梁陳屬司農北齊及隋亦然唐因之有令二人丞四人掌諸苑囿池沼種植蔬果藏冰之事

太倉署

周官有廩人下大夫上士秦官有太倉令丞漢因之屬大司農後漢令主受郡國轉漕穀其榮

陽教倉官中興皆屬河南尹歷代並有之北齊亦然後
周曰司倉下大夫隋有令二人丞六人唐有令三人丞
二人掌倉
廩出納

鈎盾署

漢鈎盾令官者典諸近園苑游觀之事屬少府
後漢亦有之晉大鴻臚屬官有鈎盾令自後無

聞北齊如晉制隋如北齊令三人丞十二人唐因之令
二人丞四人掌薪炭鵝鴨藪澤之物天寶五載九月侍
御史楊釗充木炭使自後相循
或以京尹或以戶部侍郎為之

導官署

導擇也周有舂人秦漢有令丞屬少府漢東京
令丞主舂御米及作乾糲屬大司農歷代皆有

唐置令二人丞四人掌
舂碾米麵油燭之事

苑總監

自隋而置東西南北各有監及副監唐因之
兼有丞主簿等官以掌苑內宮館園池之事

諸倉監

後漢河南尹屬官有滎陽穀倉長丞梁司農有左中右三部倉丞陳因之隋諸倉各有監官唐

因之掌倉

廩出納

司竹監

漢有司竹長丞魏晉河南淇園竹各置官守之後魏有司竹都尉隋曰司竹監唐因之有監副

監丞掌植養

園竹之事

溫泉湯監令

唐置掌湯院宇修整器物以備供奉

諸屯監

隋置諸屯監及副監畿內者隸司農自外者隸諸州唐因之置監及丞掌營種屯田功課畜產

等事

驄粟都尉

驄音搜索也漢武帝軍官不常置又有治粟都尉以桑弘羊為之

均輸令

漢有之
後漢省

幹官長

漢有之如淳曰幹音管主均輸之事所謂幹鹽鐵而權酒酤也晉灼曰此竹箭之官長均輸自

有令顏師古曰如說近是初屬

少府中屬主爵後屬大司農

籍田令

掌耕國廟社稷之田於周為甸師漢文帝初立籍田置令漢東京及魏並不置晉武泰始十年

復置江左省宋文

帝元嘉中又置

典農中郎將

典農都尉

典農校尉

並曹公置晉武帝泰始二年罷農官為郡縣後復有之隋煬帝罷典農官

勸農謁者

梁武天監九年置視殿中御史
自驤粟以下盡屬司農今並無

太府卿

丞

主簿

諸市署

平準署

左右藏

常平署

太府卿

周官有太府下大夫掌貢賦之貳受其貨賄之
入頒其貨賄于受藏之府歷代不置然其職在

司農少府至梁天監七年置太府卿位視宗正掌金帛
府帑及關津市肆陳因之後魏太和中改少府為太府
卿兼有少卿掌財物庫藏北齊曰太府寺亦有卿少卿
各一人又兼掌造器物後周有太府中大夫掌貢賦貨
賄以供國用屬大冢宰隋初與北齊同所掌左右藏及
尚方司染甄官等署煬帝置少卿二人又分太府寺置
少府監管尚方織染等而太府但管京都市及平準左
右藏等唐龍朔二年改太府為外府咸亨元年復舊光
宅元年改為司府神龍元年復舊卿二人少卿二人
領兩京諸市平準左右藏常平等九署署各有令丞

丞

周官為太府上士之任自後無聞梁太府丞一人陳

丞唐因之

有四人

主簿

周官太府下士之任自後無聞梁置一人陳

諸市署

周官有司市下大夫漢京兆尹屬官有雒陽市長丞魏晉

因之東晉則丹陽尹管之宋齊因之梁始隸太府陳因

之後魏有京邑市令北齊則司州牧領東西市令丞後

周司市下大夫隋初京市令丞屬司農煬

帝改隸太府唐因之每市令一人丞二人

平準署

周官有貨人中士下士主平定物價秦置平準

令漢因之掌知物價及主練染作彩色趙廣漢

州舉茂才為平準令後漢平準令丞隸大司農熹平四

年改平準為中準使宦者為之列於內署自是諸署悉

以閭人為令丞魏少府屬官有平準令宋唯掌染順帝即位以帝諱準故曰染署齊又曰平準屬少府梁陳則曰平水令丞北齊平準屬司農後周曰平準中士下士隋初如北齊煬帝改隸太府唐因之令二人丞四人掌官市易

左右藏署

周官有職幣上士中士主貨幣之入又外府中士主泉藏之在外者掌邦布之出入以供

百官而待邦用蓋今左藏之職也至秦漢則分在司農少府後漢少府屬官有中藏府令丞魏因之晉有左右藏令屬少府晉江東置御史掌庫曹後分庫曹曰外左庫內左庫至宋省外左庫而內左庫直曰左庫齊梁陳曰右藏北齊曰左右藏令屬太府寺後周曰外府上士中士隋如北齊唐因之置左藏令三人掌庫藏錢物布帛雜綵右藏令二人掌銅鐵毛角玩弄之物金玉珠寶香畫綵色諸方貢獻雜物

常平署

漢宣帝時耿壽昌請於邊郡皆築倉穀賤時增價而糴貴時減價而糴名曰常平倉常平之名

起於此也後漢明帝置常滿倉晉又曰常平倉自後無聞梁亦曰常平倉而不糴糴陳因之後魏太和中雖不名曰常平亦各令官司糴貯儉則出糴隋曰常平唐武德中置常平監官以均天下之價市肆騰踊則減價而出田穡豐美則增糴而收觸類長之常平令一人掌倉糧管鑰出納糴糴凡天下倉廩和糴者為常平倉正租為正倉他子為義倉

臣謹按唐天寶八載通計天下倉糧屯收并和糴等見數凡一億九千六百六萬三千二百二十石

祕書監

丞

祕書郎

校書郎

正字

著作郎

太史令

丞

祕書監

周官太史掌建邦之六典又有外史掌四方之志三皇五帝之書漢氏圖籍所在有石渠石室

延閣廣內貯之於外府又有御史中丞居殿中掌蘭臺祕書及麒麟天祿二閣藏之於內禁後漢圖書在東觀延熹二年始置祕書監一人掌典圖書古今文字考合同異屬太常以其掌圖書祕記故曰祕書後省魏武帝又置祕書令典尚書奏事即中書令之任也文帝黃初初乃置中書令典尚書奏事而祕書改令為監掌藝文圖籍之事初屬少府自王肅為監乃不屬焉其蘭臺亦藏書籍而御史掌之魏薛夏云蘭臺為外臺祕書為內閣晉武帝以祕書併入中書省其祕書著作之局不廢惠帝永平中復別置祕書監并統著作局掌三閣圖書自是祕書之府始居於外其監銅印墨綬進賢兩梁冠絳朝服佩水蒼玉宋與晉同梁曰祕書省陳因之後魏亦有之後周祕書監亦領著作監掌國史隋祕書省領著作太史二曹煬帝增置少監一人後又改監少監並

為令唐武德初復改為監龍朔二年改祕書省為蘭臺
改監為太史少監為侍郎咸亨初復舊天授初改祕書
省為麟閣神龍初復舊掌經籍圖書監國史領著作太
史二局太極元年增祕書少監為二員通判省事其後
國史太史分為別曹而祕書省但主書寫校
勘而已雖非要劇然好學君子亦求為之

臣謹按漢初御史中丞掌蘭臺祕書圖籍之事至魏
晉其制猶存故歷代營都邑置府寺必以祕書省及
御史臺為隣

丞魏武帝置祕書令及丞一人典尚書奏事後文帝黃
初中欲以何禎為祕書丞而祕書先自有丞乃以禎
為祕書右丞其後遂有左右二丞劉放為左丞孫資為
右丞後省晉復置祕書丞銅印墨綬進賢一梁冠絳朝

服嵇紹司馬彪傳暢王謚等並為此官宋為黃綬餘與
晉同齊梁尤重齊王儉為祕書丞上表求校墳籍依七
略撰七志四十卷先獻之梁劉孝綽除祕書丞武帝曰
第一官當與第一人又張率吳郡人遷祕書丞武帝曰
祕書丞天下清官東南曹緒未有為者今以相處為卿
定名稱也陳隋印綬與齊同歷代皆有後周柳蚪為祕
書丞時祕書雖領著作不參史事因蚪為丞始令監掌
焉唐龍朔二年改為蘭臺大夫咸亨初復舊掌府事檢

稽省署
抄目

祕書郎

後漢馬融為祕書郎詣東觀典校書及魏武建

國又置祕書郎嘗以劉邵為之出乘鹿車王肅
表曰臣以為祕書職於三臺為近密中書郎在尚書丞
郎上祕書丞郎宜次尚書郎下不然則宜次侍御史下
祕書丞郎俱四百石遷宜比尚書郎出亦宜為郡此陞
下崇儒術之盛也尚書郎侍御史皆乘犢車而祕書丞

郎獨乘鹿車不得朝服又恐非陛下轉臺郎為祕書丞
郎之本意也晉祕書郎掌中外三閣經書校閱脫誤進
賢一梁冠絳朝服亦謂之郎中武帝分祕書圖籍列為
甲乙丙丁四部使祕書郎中四人各掌其一左太沖為
三都賦自以所見不博求為祕書郎中鄭默為祕書郎
刪省舊文除其浮穢中書令虞松曰而今而後朱紫別
矣宋齊祕書郎皆四員尤為美職皆為甲族起家之選
待次入補其居職例十日便遷宋王敬弘子恢之召為
祕書郎敬弘求為奉朝請與恢之書曰祕書日有限故
有競朝請無限故無競吾欲使汝處無競之地文帝許
之梁張纘為祕書郎固求不遷欲徧觀閣內圖籍自齊
梁之末多以貴游子弟為之無其才實當時諺曰上車
不落則著作體中何如則祕書歷代皆有北齊又謂之
郎中隋除中字亦四員唐亦四員分掌四部經籍圖書
分判校寫功程事龍朔中改為蘭臺郎
咸亨初復舊開元二十八年減一員

祕書校書郎

漢之蘭臺及後漢東觀皆藏書之室亦著述之所文學之士使讎校於其中故有校

書之職初漢成帝時已命光祿大夫劉向於天祿閣校經傳諸子詩賦步兵校尉任宏校兵書太史令尹咸校數術太醫監李柱國校方伎後於蘭臺置令史十八人秩百石屬御史中丞又選他官入東觀皆令典校祕書或撰述傳記後漢明帝以班固為蘭臺令史撰光武本紀及諸傳記又曰傳毅為蘭臺令史與班固賈逵共典校書蓋有校書之任而未為官也故以郎居其任則謂之校書郎楊終竇章皆以郎為之以郎中居其任則謂之校書郎中蔡邕馬融皆以郎中為之當時重其職故學者稱東觀為老氏藏室道家蓬萊山焉晉宋以下無聞至後魏祕書省始置校書郎北齊亦有校書郎後周有校書郎下士十二人屬春官之外史隋校書郎十二人煬帝初減二人尋更增為四十人唐置八人掌讎校典籍為文士起家之良選其弘文崇文館著作司經局

並有校書之官皆為
美職而秘書省為最

秘書正字

後漢桓帝初置秘書監掌圖書古今文字考
合同異歷代無聞齊集書省有正書蓋正字

之任也北齊秘書省有正字隋置四人唐因之掌刊正
文字其官資輕重與校書郎同貞元八年割校書四員
正字兩員
屬集賢殿

著作郎

漢東京圖書悉在東觀故使名儒碩學入直東
觀撰述國史謂之著作東觀皆以他官領焉蓋

有著作之任而未為官員也蘭臺令史班固傅毅洛陽
令陳崇長陵令尹敏司隸校尉孟冀及楊彪等並著作
東觀魏明帝太和中始置著作郎隸中書省專掌國史
時衛覲以侍中尚書典著作晉元康二年詔曰著作舊
屬中書令秘書既典文籍宜改中書著作為秘書著作
於是改隸秘書後別自置省謂之著作省而猶隸秘書

著作郎一人謂之大著作專掌史任李充為大著作于
時典籍混亂充刪除煩重分作四部祕閣以為永制又
荀勗以中書監孫盛以祕書監並領著作孫綽以散騎
常侍及陳壽並為大著作進賢兩梁冠介幘絳朝服王
隱待詔著作單衣介幘月朔詣於著作省宋齊與晉同
梁制一梁冠而無印綬此並大著作也魏氏又置佐著
作郎亦屬中書晉佐著作郎八人進賢一梁冠絳朝服
祕書監自調補之鄒湛謂祕書監和嶠曰閭纂可佐著
作嶠曰此職閑重勢貴多爭不暇求才按此則大著作
亦監自調晉制佐著作郎始到職必撰名臣傳一人宋
初以國朝始建未有合撰者其制遂廢矣宋齊以來遂
遷佐於下謂之著作佐郎亦掌國史集注起居梁初周
捨裴子野皆以他官領其職冠制與大著作同陳氏為
令僕子起家之選後魏有著作郎佐郎北齊著作郎佐
郎各二人後周有著作上士二人中士四人掌綴國錄
屬春官之外史隋以祕書省為著作曹著作郎二人佐

郎八人煬帝加佐郎為十二人唐為著作局置著作郎
二人佐郎四人開元二十六年減佐郎二員亦屬祕書
省自宋已後國史悉屬祕書龍朔二年改著作郎為司
文郎中佐郎為司文郎咸亨初復舊初著作郎掌修國
史及製碑頌之屬分判局事佐郎貳之徒有撰史之名
而實無其任其任盡在史館矣其屬官有校書郎二人
後魏著作省置校書郎北齊著作亦置校書郎二人隋
亦司掌校讎書籍若本局無書兼校本省典籍正字二
人唐減一人
掌同校書

太史局令

昔少皞氏以鳥名官其鳳鳥氏為歷正至顯
帝氏命南正重以司天北正黎以司地唐虞

之際羲氏和氏紹重黎之後世序天地夏有太史終古
者當桀之暴知其將亡乃執其圖法而奔于商商太史
高摯見紂之亂載其圖法出奔于周周官太史掌建邦
之六典正歲年以序事頒告朔于邦國魯昭公二年晉

韓宣子聘魯觀書于太史氏見易象與魯春秋曰周禮盡在魯矣又有馮相氏視天文之次保章氏掌天文之變當周宣王時太史官失其守而為司馬氏司馬氏世典周史惠襄之間有子頽叔帶之亂故司馬氏適晉晉中軍隨會奔秦而司馬氏入梁秦為太史令胡毋敬之為之漢武置太史以司馬談為之位在丞相上天下計書先上太史副上丞相談卒其子遷嗣之遷死後宣帝以其官為令行太史文書而已後漢太史令掌天時星厯凡歲將終奏新年厯凡國祭祀喪娶之事掌奏良日及時節禁忌國有瑞應災異則掌記之秦漢以來太史之任蓋併周之太史馮相保章三職自漢晉宋齊並屬太常銅印墨綬進賢一梁冠絳朝服江左高營以侍郎陳卓以義熙守吳道欣以殿中侍御史皆兼領太史梁陳並同晉氏後魏北齊並如晉宋後周之制春官府置太史中大夫一人掌厯家之法隋曰太史曹令並各置二人而屬祕書省煬帝又改曹為監有令唐初改監為

局置令龍朔二年又改太史局為祕書閣改令為郎中丞為祕書閣郎咸亨初復舊初屬祕書省久視元年改為渾天監不隸麟臺改令為監置一人其年又改為渾儀監長安二年復為太史局又隸麟臺其監復為太史局令置二人景龍二年復改局為監而令名不易不隸祕書開元二年復改令為監改一員為少監十四年復為太史局置令二人復隸祕書後又改局為監乾元元年又改其局為司天臺掌天文歷數風雲氣色有異則密封以奏其小吏有司歷保章正靈臺郎挈壺正等官各有差

丞

二人司馬彪續漢志云太史有丞一人魏以下歷代皆同隋置二人煬帝減一人唐初不置丞久視初改

為渾儀監始置丞二人煬帝減一人長安二年又省景龍二年復置凡天下測影之處分至表準其詳可載故

參考星度稽驗

晷影各有典常

臣謹按唐開元中測影使者大相元太云交州望極
纔出地三十餘度以八月自海中南望老人星殊高
老人星下衆星粲然其明大者甚衆圖所不載莫辨
其名大率云南極二十度以上其星皆見乃自古渾
天家以為常沒地中伏而不見之所也

殿中監

丞

尚食

尚藥

尚衣

尚舍

尚乘

尚輦

殿中監

魏始置焉晉宋並同齊有內殿中監外殿中監
各八人梁陳因之其資品極下後魏亦有殿中

監北齊有殿中局置監四人屬門下省掌駕前奉引隋
改為殿內局置監二人大業三年分門下太僕二司取

殿內監名以為殿內省有少監監丞各一人掌諸供奉
領尚食尚藥尚衣尚舍尚乘尚輦等六局每局各置奉
御二人以總之置直長以貳之屬門下省唐改為殿中
省加置少監二人丞亦二人其官屬職任一如隋制為
一司不屬門下龍朔二年改殿中省為中御府改監
為中御大監少監改丞為中御大夫咸亨初復舊

臣謹按漢儀注曰省中有五尚即尚食尚冠尚衣尚
帳尚席或云秦置六尚謂尚冠尚衣尚席尚沐尚食
尚書若今殿中之任也

丞

隋置一人
唐加一人

尚食局奉御

始秦置六尚有尚食焉如淳曰掌天子之
物曰尚後漢以後并其職於太官湯官北

齊門下省又有尚食局置典御二人後周有內膳上士中士凡進食先嘗之隋分屬殿內改典御為奉御有二
人唐因之龍朔二年改為奉膳大夫咸亨
初復舊直長隋置六人唐因之減置五人
尚藥局奉御 自梁陳以後皆太醫兼其職北齊門下省
而屬殿內唐因之龍朔二年改為奉醫大
夫咸亨初復舊直長隋置四人唐因之

尚衣局奉御

周官有司服中士掌王之服辨其名物戰

國有尚衣尚冠之職秦漢有御府令丞掌
供御服而屬少府後漢又掌官者典官婢作中衣服魏
因之晉屬光祿勳江東省宋大明中改尚方曰左右御
府各置令丞一人後廢帝初省御府置中署隸右尚方
其後又置初宋氏用三品勳位明帝改用二品淮南臺
御史掌金銀綵帛凡諸造作以供奉及妃主六宮梁陳
其職隸在尚方後魏有掌服郎北齊門下省統主衣局

都統子統各二人後周有司服上士二人中士二人隋分屬殿內省其後又改為尚衣局置奉御二人唐因之龍朔三年改為奉冕大夫咸亨元年復舊直長隋置八人唐因之減二人

尚舍局奉御

周禮有掌舍掌行所解止之處帷幕幄帟之事漢少府屬官有守宮令丞掌宮殿陳

設魏殿中監掌帳設監護之事晉宋以下其職並在殿中監隋煬帝置殿中監改殿內局為尚舍局置奉御二人唐因之龍朔二年改為奉宸大夫咸亨元年復舊直長隋置八人唐因之而減二人

尚乘局奉御

自秦漢以來其職皆在太僕北齊太僕驛騶署有奉乘十人管十二閑馬隋煬帝取

之置尚乘局奉御二人唐因之增置奉御四人龍朔二年改為奉駕大夫咸亨元年復舊尚乘奉御掌六閑馬一日飛黃閑二曰吉良閑三曰龍媒閑四曰駒騄閑五曰駉閑六曰天苑閑開元中減二人先是別置廄使

因隸焉猶屬殿中直長
隋置十四人唐減四人

尚輦局奉御

周官小司徒中大夫掌六畜車輦又宗伯中車下大夫掌王后之五輅輦車組輓有

翬羽蓋漢魏晉並太僕屬官車府令掌之東晉省太僕遂隸尚書駕部宋齊梁陳車府乘黃令丞掌之後魏北齊則乘黃車府令兼掌之後周則司車輅主之隋又乘黃車府令丞掌之煬帝置殿內省尚輦局奉御二人唐因之龍朔二年改為奉輦大夫咸亨元年復舊直長四人隋置唐因之

臣謹按古謂人牽為輦春秋宋萬以乘車輦其母秦始皇乃去其輪而輿之漢代遂為人君之乘後漢有乘輿六輦魏晉小出則乘之及過江而亡孝武太元

年中謝安率意而作及破苻堅得之形制無差大小
如一時人嗟其默識宋武破慕容超獲金鉏輦古之
輦輿大率以六尺為度齊武帝造大小二輦輿雕飾
甚工下桐轆輒悉金花銀獸梁大輦中方八尺左右
開四望金鸞栖輒隋有六輦大禮皆乘之

諸卿第七下

內侍省

內侍

內常侍

內給事

內謁者監

內寺伯

掖庭局

宮闈局

奚官局

內僕局

內府局

內侍

天文有宦者四星在帝座之西周官有內小臣閭人寺人詩有巷伯寺人春秋皆謂之寺人戰國時

趙有宦者令繆賢秦少府屬官有中書謁者令丞又有將作衛尉少府各一人並皇后卿也又云詹事掌皇后太子家屬官有中長秋私府宦官皆屬焉漢景帝中元六年改將作為大長秋或用中人或用士人成帝加置太僕一人掌太后輿馬通謂之皇太后卿皆隨太后宮為官號在正卿上無太后則闕又有長信詹事掌皇太后宮景帝六年更名長信少府平帝元年更名長樂少府帝祖母稱長信宮帝母稱長樂宮故有長信少府長樂少府職如長秋位在長秋上及職吏皆宦者也後漢常職掌奉中宮命凡給賜族親及當謁見者關通之中宮出則從屬官有丞中宮僕謁者私府署令初秦又置中常侍官參用士人皆銀璫左貂給事殿省漢制置侍中中常侍各一人省尚書事黃門侍郎一人傳發書奏皆用姓族後漢中常侍贊導內事顧問應對永平中始

定員數中常侍四人漢舊儀曰秩千石得出入卧内舉法禁中小黃門十人自明帝以後員數稍增改以金璫右貂兼領卿署之職自和熹太后以女主稱制不接公卿乃以閹人為常侍小黃門通命兩宮自此以來悉用閹人不調他士自安迄桓權任尤重手握王爵口含天憲桓帝既與宦官謀誅梁冀乃封宦者五人同日為侯皆食邑故世號五侯焉及袁紹大誅宦者之後永巷掖庭復用士人間闌出入莫有禁切侍中侍郎門部駟宰中外雜錯醜聲彰聞魏改漢制三卿在九卿下晉復舊在同號卿上有后則置無后則闕齊鬱林王立文安太后即尊號以宮名置宣德衛尉少府太僕梁有弘訓太后亦置屬官陳亦有太后三卿後魏大長秋掌顧問應對自文明馮后閹宦用事大者令僕小者卿守時有官者趙黑為選曹尚書北齊有中侍中省置中侍中二人中常侍四人掌出入門閤又有長秋寺置卿中尹各一人掌諸宮閤領掖庭等令並用宦者後周有司内上士

小司內中士巷伯中士等官隋曰內侍省領內侍內常侍等官內侍即舊長秋也內常侍即舊中常侍也煬帝改內侍省為長秋監令一人少一人丞二人並用士人餘用宦者領掖廷宮闈奚官三署亦參用士人唐武德初改為內侍省皆用宦者龍朔三年改為內侍監咸亨元年復舊光宅元年改為司宮臺神龍元年復舊有內侍四人掌知宮內供奉中宮駕出夾引總判局事舊二人開元中加二人七年三月勅內侍五品以上許養一子仍以同姓者初

養日不得過十歲

內常侍

六人通判局事屬官有內給事八人內謁者監六人內寺伯二人寺人六人領掖庭宮闈奚官

內僕內府等五局

臣謹按後漢和帝幼沖竇憲以外家專政鈎盾令鄭

衆等專謀禁中收憲印綬竭忠盡瘁一心王室每策
勲班賞辭多受少由是常與議事中官用權自衆始
也又按唐神龍元年以後始以中使出監諸軍兵馬
寶應元年五月勅諸道州所承上命須憑正勅可施
行不得便信中使宣勅即遵行

內給事

周禮內小臣之職掌王后之命后出入前驅後漢少府有給事黃門常侍左右止在內宮關通

中外及中宮已下衆事自魏晉至于梁陳無其職後魏有中給事中後改為中給事北齊中侍中省有中給事中四人煬帝改為內承直唐復為內給事置八人

內謁者

後漢大長秋屬官有中宮謁者三人主報中章後魏北齊有中謁者僕射隋內侍省有內謁者

監六人內謁者

十二人唐因之

內寺伯

周禮寺人掌王之內人及女宮之戒令隋內侍省有內寺伯二人唐因之

掖庭局

令秦置永巷漢武更名掖庭置令掌宮人簿帳公桑養蠶及女工等事後漢掖庭令掌後宮貴

人采女又有永巷令典官婢皆宦者並屬少府唐置二人

宮闈局

令二人隋置令掌宮內門閤之禁及出納神主并內給使名帳糧廩事唐因之

奚官局

令二人周禮酒人漿人邊人醢人醢人醢人冪人女祝司服守祧並閤官所職皆有奚奴或曰

奚官女也齊梁陳隋有奚官令掌宮人疾病醫藥罪罰喪葬等事唐置二人

內僕局

令二人後漢有中宮僕令掌車輿雜畜及導等事唐置二人

內府局

令二人漢少府屬官有內者局令隋曰內者唐為內府置令二人掌內庫出納帳設澡沐之事

少府監

丞主將中尚左尚右尚織染掌冶等五署暴室等三丞

少府監

少府秦官漢因之是為九卿掌山海池澤之稅以給供養應劭曰山澤之稅名曰禁錢以給私

養故稱少府顏師古曰大司農供軍國之用少府以養天子也天子曰少府諸侯曰私府後漢少府卿一人掌中服御之諸物衣服寶貨珍膳之屬朝賀則給璧凡中書謁者尚書令僕侍中常侍黃門御史中丞以下皆屬焉晉制銀章青綬五時朝服進賢兩梁冠絳朝服佩水蒼玉哀帝末省并丹陽尹孝武復置宋少府領左右尚方御府東冶南冶平準等令丞齊又加領左右銀鋸署梁少府為夏卿位視尚書左右丞陳因之後魏少府謂

之六卿蓋以少府宗正太僕廷尉司農鴻臚為六卿至孝文太和中易制官品遂改少府為太府北齊無少府其尚方等署皆隸太府至隋煬帝大業五年又分太府為少府監置監及少監復領尚方織染等署後又改監少監並為令唐武德初置軍器監廢少府監貞觀元年五月分太府中尚方織染坊掌冶坊置少府監龍朔二年改為內府監咸亨元年復舊光宅元年改為尚方監神龍元年復舊監一人總判少監二人通判領中尚右尚左尚織染掌冶等五署開元十年五月於北都置軍器監至二十六年五月又廢

臣謹按後漢東平王蒼為驃騎正月朔朝蒼當入賀故事少府給璧時陰就為少府貴傲不奉法漏將盡而求璧不得蒼掾朱暉遙見少府主簿持璧乃往給

曰試請觀之既得而馳奉之就復以他璧朝

丞

漢有六人後漢省五而有一丞歷代皆一人山公啓事曰中郎衛昱往為少府丞甚有損益唐置四人

主簿

晉置二人歷代一人唐有二人

中尚署

周官為玉府秦置尚方令漢因之後漢掌上工作御刀劍玩好器物及寶玉作器宦者蔡倫

為尚方令監作祕劍及諸器械莫不精工堅密為後代法兩漢又有考工令主作兵器其職稍同按考工令作兵器兵器成則付執金吾入武庫及主織綵諸雜工初屬少府中屬主爵光武時屬太僕漢末分尚方為中左右三尚方魏晉因之自過江唯置一尚方哀帝以隸丹陽尹宋武帝踐阼以相府作部配臺謂之左尚方而本署謂之右尚方並掌造軍器令丞各一人隸門下孝武大明中改右尚方曰御府御府二漢已有之典官婢作

褻衣服補浣之事魏晉猶置其職江左乃省焉後廢帝初省御府置中署隸右尚方則漢之考工令如宋之尚方令尚方令如宋中署矣齊左右尚方各一人梁有中左右尚方北齊亦三尚方隸太府隋煬帝分隸少府唐省方字有中左右三尚署令丞各一人中尚署供內營造雜作左尚掌車輦織扇膠漆畫鏤等作右尚掌皮毛膠墨雜作席薦等事開元以後別置中尚使以監

織染署

令一人周禮天官典絲掌綬文織絲組焉染人掌染絲帛秦置平準令韋昭釋名曰平準令主

染色染有常平之法故準而則之漢因之及主物價練染初少府屬官有東織西織成帝省東織更名西織為織室北齊中尚方領涇州雍州絲局定州細綾局丞後周有司織下大夫隋有司織司染二署煬帝合織染為一令掌織組綬錦綾冠幘并染色等唐因之有令丞

掌冶署

秦漢郡國有鐵官諸郡國出鐵者則置鐵官長丞晉治令掌工徒鼓鑄隸衛尉尉東晉省衛尉始

隸少府宋有東冶南冶各置令丞而屬少府齊因之江南諸郡縣有鐵者或置冶令或置冶丞多是吳所置梁陳有東西冶北齊諸冶屬太府後周有冶工鐵工中士隋有掌冶令丞唐於京師置冶署有令丞各一人掌造鑄金銀銅鐵塗飾琉璃玉作等事

暴室丞

後漢暴室丞宦者也主中婦人疾病者就此室治之其皇后貴人有罪亦就此室屬少府其後

之無

海丞

漢平帝置少府海丞一人掌海稅後無

果丞

與海丞同置掌諸果實後無

將作監

丞官

主簿中校

左右校東園主章令

左校

右校

甄

將作監

少皞氏以五雉為五工正以利器用唐虞共工周官之冬官蓋其職也秦有將作大匠後漢少

府掌治宮室漢景帝中元六年更名將作大匠後漢位次河南尹中元二年省以謁者領之章帝建初元年復置初以任隗為之掌修作宗廟路寢宮室陵園木土之功并植桐梓之類列于道側李固遷大匠常推賢貢士孔融以將作大匠遷少府魏晉因之江左至宋齊皆有事則置無事則省梁改為大匠卿陳因之後魏亦有之北齊有將作寺其官曰大匠有功曹主簿長史司馬等官屬後周有匠師中大夫掌城郭宮室之制及諸器物度量又有司木中大夫掌木工之政令隋與北齊同至開皇二十年改寺為監大匠為大監初加置副監煬帝改大監少監為大匠少匠十三年又改為大令少令唐復皆為匠龍朔二年改將作為繕工監咸亨元年復舊

光宅元年改為營繕監神龍元年復舊大匠一人總判少匠二人通判天寶中改大匠為大監少匠為少監領左校右校甄官中校四署

丞

漢有二人後漢一人魏晉因之東晉以後有事則置無事則省梁又置一人陳因之後魏有之北齊四人

後周曰匠師中士
隋二人唐四人

主簿

晉置自後與丞同
隋二人唐因之

左右校署

秦及漢初有左右前後中五校令後唯置左右校令後漢因之掌左右工徒度尚自右校

令擢拜荊州刺史魏併左校右校於材官晉左右校屬少府宋以後並有左校令丞北齊亦有之隋左右校令丞屬將作唐因之

左校署

令丞二人掌營繕木作採材等事

右校署

令丞二人掌營土作瓦泥並燒石灰厠溷等事

甄官署

令丞二人後漢有前後中甄官令屬將作晉有甄官署掌埴瓦之事宋齊北齊隋悉有之唐因

之掌營埴

石甃瓦

中校署

秦漢有之後無唐置令丞各一人掌舟車雜兵仗廩牧

東園主章令

漢有之武帝更名木工如淳曰章謂木材也後世無此官

國子監

祭酒 司業 丞 主簿 國子 太學 廣文 四門 律學 書學 算學 博

士助教等

國子祭酒

孫卿在齊為三老稱祭酒胡廣曰凡官名祭酒皆一位之元長古者賓得主人饌則老者

一人舉酒以祭地故以祭酒為稱漢之侍中魏之散騎常侍功高者並為祭酒用其義也公府有祭酒亦因其名漢吳王濞年老不朝為劉氏祭酒則祭酒之名久矣王莽以安車駟馬迎夏侯勝為講學祭酒勝推而不受又漢置博士至東京凡十四人而聰明有威重者一人為祭酒謂之博士祭酒蓋本曰僕射中興轉為祭酒魏因之晉武帝咸寧四年初立國子學置國子祭酒一人永嘉中置儒林祭酒以杜夷為之國子者周之舊名周官有師氏之職即國子祭酒也晉介犢皂朝服進賢兩梁冠佩水蒼玉舊視侍中列曹尚書劉毅嵇紹並為此官又袁瓌為國子祭酒時屢經喪亂禮教陵遲瓌上疏求立學徒故國學之興自瓌始也又裴頠為祭酒奏立太學起講堂築門刻石寫五經焉宋不置學則助教唯置一人而祭酒博士不常置也明帝太始六年以國學

廢初置總明觀祭酒一人有元儒文史四科科置學士各十人齊高帝建元四年有司奏置國學祭酒准諸曹尚書博士准中書郎助教淮南臺御史選經學為先若其人難備給事中以選明經者以本位領其後國諱廢學永明三年立學尚書令王儉領祭酒學既建乃省總明觀八年國子博士何允單為祭酒疑所服陸澄等皆不能據遂以元服臨試月餘日博議定乃服朱衣齊梁號為國師梁王承為國子祭酒承祖儉父暕並居此職三代為國師前代未有時以為榮暕音簡陳因之後魏亦曰國子祭酒其初定中原先立太學置五經博士北齊國子寺有祭酒一人隋開皇十三年國子寺罷隸太常凡國學諸官自漢以下並屬太常至隋始革之又改寺為學仁壽元年罷國子學唯立太學一所省國子祭酒博士置太學博士總知學事煬帝即位改國子學為國子監依舊置祭酒唐因之龍朔元年東都亦置龍朔二年改為司成館又改祭酒為大司成咸亨初復舊光

宅元年改國子監為成均監神龍元年復舊領國子學學生三百人太學學生五百人四門學學生五百人俊士八百人律學學生五十人書學學生三十人算學學生三十人置祭酒一人掌監學之政皇太子受業則執經講說皆以儒學重者為之天寶九載置廣文館領學生為進士業者置博士助教各一人品秩與太學同

臣謹按漢昭帝增博士弟子員滿百人宣帝末增倍之元帝時詔能通一經者皆復數年郡國置五經百石卒史成帝末增弟子員三千人平帝時王莽增元士之子得受業如弟子以為員歲課甲科四十人為郎中乙二十人為太子舍人丙四十人補文學掌故

後漢安帝薄於藝文博士倚席不講學舍額弊鞠為園蔬牧兒芻豢至於薪刈順帝感翟酺之言乃更修黌宇凡所構二百四十房千八百五十室增甲乙之科員各十人除郡國耆儒皆補郎舍人又按唐神龍之後六學生徒二千二百一十人每學各置博士以總學事及有助教等員天寶九載又於國子監置廣文館領學生為進士業者置博士助教各一人品秩與太學同

國子司業

隋煬帝大業三年於國子監初置司業一人禮曰樂正司業父師司成因以為名唐置二

人副貳祭酒通判監事龍朔二年改為少司成咸亨初復舊凡祭酒司業皆儒重之官非其人不居

丞

隋置三人唐一人

主簿

北齊置隋一人唐因之

國子博士

班固云按六國時往往有博士掌通古今又曰博士秦官漢因之漢博士多至四十人兩

梁冠漢儀云文帝博士七十餘人為待詔博士朝服立端章甫冠武帝建元五年初置五經博士宣帝稍增員十二人博士選有三科高第為尚書次為刺史其不通政事以久次補諸侯太傅于時孔光為博士數使錄究獄行風俗後漢博士凡十四人易施孟梁丘京氏尚書歐陽大小夏侯詩齊魯韓毛禮大小戴春秋公羊嚴顏

各一博士初欲立左氏傳博士范升以為左氏淺末不宜立陳元聞之乃詣闕上疏爭之卒立左氏學各掌以五經教子弟國有疑事掌承問對舊時從議郎為博士其通叡異藝入平尚書出部刺史諸侯守相久次轉諫議大夫中興高第為侍中小郡若都尉博士限年五十安帝以博士多非其人詔命三公將軍中二千石舉博士各一人務得經明行高卓爾茂異是時羣僚承風凡所旌貢綽有餘裕後旋復故遂用陵遲初平帝元始四年改博士為博士師後漢兼而存之並擇儒者桓榮魯恭戴憑等並為博士魏及西晉朝博士置十九人武帝咸寧四年初立國子學置國子博士一人皆取履行精淳通明典義若散騎常侍中書侍郎太子中庶子以上乃得召試元帝時荀崧上疏曰昔咸寧太康永嘉之中侍中常侍黃門通洽古今行為世表者領國子博士宋齊諸博士皆皂朝服進賢兩梁冠佩水蒼玉梁國學有博士二人天監四年置五經博士各一人魏晉宋齊並

不置五經博士至北齊始置焉舊國子學生限以貴賤武帝欲招來後進五館生皆引寒門雋才不限人數陳因之後魏北齊並有之隋仁壽元年省國子博士大業三年復置一人唐增置二人龍朔二年改為司成宣業咸亨初復舊諸州亦有經學博士一人

臣謹按後魏崔逸為國子博士每公事逸常被詔獨進博士特命自逸始也

助教

晉咸寧四年初立國子學助教十五人以教生徒江左及宋並十人宋制易尚書毛詩禮記周禮儀

禮左傳公羊穀梁各為一經論語孝經為一經合十經助教分掌宋齊並同梁國子助教舊視南臺御史品服與博士同陳因之後魏亦有北齊置十人隋置四人唐國子學助教三人諸府州縣各有助教員府州二人縣

一人學生
各有差

太學博士

晉江左增置國子博士十六人謂之太學博士品服同國子博士梁置太學博士八人陳

因之後魏亦然北齊國子寺有太學博士十人後周置太學博士下大夫六人隋初置太學博士五人仁壽元年罷國子唯立太學置博士五年大業三年減置二人唐因之

助教

後魏始置北齊亦有之置二十人後周曰太學助教上士隋又曰太學助教五人大業三年減三人

唐因之

廣文館博士

一人助教一人並以文士為之唐天寶九載置

四門博士

後魏書劉芳表云太和二十年立四門博士於四門置學按禮記曰天子設四學鄭玄注

同西郊之虞庠也今以其遼遠故置於四門請移與太學同處從之北齊二十人隋五人唐二人

助教

北齊國子寺有二十人隋初則五人唐因之

直講

四人唐初置無員數長安四年始定為四員

大成

二十人唐置取貢舉及第人簡聰明者試書日誦得一千言并日試策所習業等十條通七然後補

充仍散官祿俸賜會同直官例給武太后長安中省而有直講定為四員

律學博士

晉置屬廷尉梁曰胄子律博士屬廷尉陳亦有律博士後魏北齊並有之隋大理寺官屬

有律博士八人唐因之而置一人移屬國學掌教文武八品以下及庶人之子為生者以律令為專業格式法例兼習之助教一人而從九品上

書學博士

唐置三人掌教文武八品已下及庶人之子為生者以石經說文字林為專業餘字書兼

習之又置

典學二人

算學博士

二人典學二人掌教文武八品已下及庶人之子為生者二分其經以為之業習九章海

島孫子五曹張丘建夏侯陽周髀等及綴

術緝古之術其記遺三等數亦兼習之

軍器監

丞

主簿

甲坊署

弩坊署

軍器監

後周武帝四年初置軍器監唐武德初因之貞觀元年罷軍器大監置少監後省之以其地隸

少府監為甲弩坊開元初復以其地置軍器使至三年以使為監更置少監一員丞二員主簿一員錄事一員及弩坊等署十一年悉罷之復隸少府為甲弩坊十六年移其名於北都置軍器監亦嘗以太原尹兼領天寶

六載復於舊所置軍器監
監一人領甲坊弩坊兩署

丞主簿

各一人
唐置

甲坊署令丞

隋少府有甲
鎧署唐改焉

弩坊署令丞

隋有弓弩
署唐改焉

都水監

使者

丞

主簿

舟楫署

河渠署

都水使者

虞舜命益作虞以掌山澤周官有林衡川衡
二官掌林麓川澤之禁漢武帝元鼎二年初

置水衡都尉掌上林苑其屬有上林均輸御羞禁園損
權鍾官伎巧六廩辨銅九官令丞又衡官水司空都水
農倉及甘泉上林都水七官長丞皆屬焉蓋主上林離
宮燕休之處後漢光武省之并其職於少府每立秋軀

劉之日輒暫置水衡都尉。劉將祭大獵也，事訖省。初秦漢又有都水長丞，主陂池灌溉，保守河渠。自太常少府及三輔等皆有其官。漢武帝以都水官多，乃置左右使者以領之。至漢哀帝省使者官，至東京凡都水皆罷之。併置河隄謁者。漢之水衡都尉，本主上林苑。魏世主天下水軍舟船器械。晉武帝省水衡置都水臺，有使者一人掌舟航及運部，而河隄為都水官屬。元康中復有水衡都尉，時陳慎、戴熊俱以都水使者領水衡都尉。懷帝永嘉六年，胡賊入洛陽，都水使者奚濬先出督運，得免。江左省河隄，宋都水使者銅印墨綬，進賢兩梁冠，與御史中丞同。孝武帝初省都水臺，罷都水使者，置水衡令。孝建元年復置齊有都水臺使者一人。梁初與齊同。天監七年改都水使者為大舟卿，位視中書郎，列卿之最末者。主舟航河隄。陳因之後，魏初皆有水衡都尉及河隄謁者。都水使者官至永平二年都水臺依舊置二使者。北齊亦置二使者。隋開皇三年廢都水臺，入司農。

十三年復置仁壽元年改臺為監更名使者亦為監煬帝又改為使者尋又為監加置少監又改監及少監並為令領舟楫河渠二署唐武德八年置都水臺後復為都水監置令隸將作貞觀中復為都水監置使者龍朔二年改都水使者為司津監丞咸亨元年復舊光宅元年改都水監為水衡置都尉神龍元年復為都水監置使者二人分總其事不屬將作領舟楫河渠二監

丞漢有水衡丞五人亦有都水丞後漢晉初都水使者有參軍二人蓋亦丞之職任宋因之梁大舟卿有丞陳因之後魏北齊又曰參軍隋曰都水丞唐二人

主簿晉水衡都尉有之為左右前後中五水衡令悉皆有之梁大舟卿亦有之至隋又置唐因之

舟楫署漢主爵中尉屬官有都船令丞水衡都尉有楫權令丞晉曰船曹吏齊曰官船典軍後周曰舟

中士隋為舟楫令丞
唐因之令丞各一人

河渠署

隋煬帝置令丞
各一人唐因之

通志卷五十四

欽定四庫全書蒼要卷八千九百五十四

史部

通志卷五十五

宋右迪功郎鄭樵漁仲撰

職官略第五

武官第八上

將軍總叙

左右衛

併親衛
官屬附

左右驍衛

左右武

衛 左右威衛

左右領軍衛

左右金吾衛

左右監門衛

左右千牛衛

左右羽林軍

左

右龍虎軍

左右神
虎軍附

將軍總叙

三代之制天子六軍其將皆命卿故夏書曰大戰于甘
乃召六卿蓋古之天子寄軍政於六卿居則以田警則
以戰所謂入使治之出使長之之義其職在國則以比
長閭胥族師黨正州長鄉大夫為稱在軍則以卒伍司
馬將軍為號所以異軍國之名諸侯之制大國三軍次
國二軍小國一軍其將亦命卿也晉獻公初作二軍公

將上軍未有其號魏獻子衛文子始有將軍稱

左傳曰晉閭沒

女寃謂魏子曰豈將軍食之而有不足注曰獻子為將軍率故謂之將軍又禮記曰將軍文子之喪

自戰

國置大將軍周末又置前後左右將軍秦因之位上卿

金印紫綬漢興置大將軍驃騎將軍位次丞相車騎將

軍衛將軍左右前後將軍皆金印紫綬位次上卿

後漢志曰

漢將軍比公者四謂大將軍驃騎車騎衛將軍

掌京師兵衛四夷屯警孝武征

閩越東甌又有伏波樓船及伐朝鮮大宛復置橫海度

遼貳師宣帝增以蒲類破羌權時之制若此非一亦不

常設光武中興諸將軍皆稱大及天下已定武官悉省
四征興於漢代四安四平起於魏初後漢有三鎮之稱
魏有鎮北之號晉武帝重兵官故軍校多選朝廷清重
之士居之置中軍將軍以統宿衛七軍及五王作難東
海王越以頃興事皆由殿省乃奏宿衛有侯爵者皆罷
之時殿中武官並封侯由是出者略盡皆涕泣而去乃
以東海國官領左右衛以國兵宿衛晉宋以來以領軍
護軍左右二衛驍騎游擊將軍謂之六軍

宋興服志曰
驍騎車騎衛

將軍及諸將軍加大者皆金章紫綬武冠
佩水蒼玉諸軍司馬銀章青綬朝服武冠其四安四平

左右前後征虜等將軍及四中郎將晉代荀羨王胡之
並居此官宋齊以來唯處諸王素族無為者齊以二衛
四軍五校驍騎游擊積射彊弩殿中員外殿中武衛七
將軍殿中司馬左右及虎賁之中郎將冗從僕射羽林
監武騎常侍謂之西省而散騎為東省梁武帝以將軍
之名高下舛雜命更加釐定於是有司奏置一百二十
五號將軍以鎮衛驃騎車騎為二十四班四征四中為

二十三班八鎮為二十二班八安為二十一班四平四
翊為二十班凡三十六號為重號將軍又有五德將軍
忠勇軍師武臣爪牙龍騎雲麾鎮兵翊師宣惠果毅智
威仁威勇威信威嚴威智武仁武勇武信武嚴武是為
五德將軍也 以班多者為貴凡十品二十四班品取其盈數

班法氣候之數制簿悉以大號居後以為選法自小遷
大也前史所記以位得從公故將軍之名次于台槐之
下至是備其班品叙於百官之外凡一百二十五將軍
後魏將軍之名多矣謂驃騎車騎衛為三將軍末年有

八柱國大將軍其中六人各督二大將軍凡十二大將

軍

元贊元育元廓侯莫陳順宇文遵達奚武李遠豆盧寧宇文貴賀蘭祥楊忠王雄是也

又各分

統開府一人一開府領一軍兵是為二十四軍分掌禁

旅當爪牙禦侮之寄自大統十六年以後功臣位至柱

國及大將軍者衆矣咸是散秩無復統禦

後周武帝三年改諸軍軍

士並為侍官

隋煬帝以左右衛左右屯衛左右禦衛左右候

衛凡十二衛各置大將軍一人將軍二人以總府事

每衛

各置長史錄事參軍司倉兵騎鎧等參軍員軍人總名衛士

蓋魏周十二大將軍之

遺制唐武德初秦王既平王世充及竇建德高祖以秦

王功殊今古自昔位號不足以爲稱乃特置天策上將

軍以拜焉位在王公上及升儲宮遂廢天策府二年七

月高祖以天下未定事資武力將舉關中之衆以臨四

方乃置十二軍分關中諸府以隸焉

以萬年道爲參旗軍長安道爲鼓旗

軍富平道爲元戈軍醴泉道爲丹鉞

軍同州道爲羽林

軍華州道爲騎官軍寧州道爲折威

軍岐州道爲平道

軍豳州道爲招搖軍麟州道爲苑游

軍

涇州道爲天紀軍宜州道爲天節軍

每軍將一人副

一人取威名素重者爲之

楊恭仁劉弘基長孫順德等爲其將

督耕戰之

備自是士馬彊勁無敵於天下五年省七年以突厥寇掠復置十二軍後又省之其後定制有左右衛左右驍左右武左右威左右領軍左右金吾左右監門左右千牛凡十六衛大將軍各一人

左右衛及左右金吾總謂之四衛其餘謂之雜衛

將軍總三十人

左右千牛衛將軍各一人餘衛各二人

左右羽林左右龍

虎左右神虎六軍大將軍各一人將軍各三人皆有衛署其餘驃騎輔國鎮軍冠軍四大將軍雲麾勇武壯武宣威明威定遠寧遠游騎游擊等九將軍並為五品以

上武散官先天二年正月十日詔往者衛士計戶取充使二十一入幕六十出軍既憚劬勞咸欲避匿今改取二十五以上充十五年即放出頻經征鎮者十年放出自今已後羽林飛騎先於衛士中簡擇開元六年始詔折衝府兵每六歲一簡自高宗武后時天下久不用兵府兵之法浸壞番役更代多不以時衛士稍稍亡匿至是益耗散宿衛不能給宰相張說乃請一切募士宿衛十一年取京兆蒲同岐華府兵及白丁而益以潞州長

從兵共二十萬號長從宿衛歲一番命左丞蕭嵩與州刺史共選之明年更號曰彊騎

臣謹按宋志曰冗從僕射漢東京有中黃門冗從僕射非其職也魏代因其名而置冗從僕射職官要錄曰本期門之職後漢桓帝時置冗從僕射掌諸散從其射事則主帥之

左右衛

并親衛官屬附

漢京師有南北軍掌理禁衛

南軍若唐諸衛北軍若唐羽林等軍周勃駘八北軍

是初有衛將軍魏末晉文王又置中衛將軍武帝受禪

分中衛為左右衛將軍

以羊琇為左趙序為右

並置佐吏皆掌宿

衛營兵銀章青綬武冠絳朝服佩水蒼玉宋齊謂之二衛各領營兵每暮一人宿直後增二衛儀從為九十人

陳因之後魏永光初又增置左右衛將軍各二人北齊

二人分掌左右廂所主朱華閣以外各武衛將軍二人

貳之隋初左右衛大將軍各一人將軍各二人又各統

親衛煬帝改左右衛為左右翊衛

又加置親衛并領勳武二衛煬帝改三衛

為三侍非翊衛
府皆無三侍

其所領軍士名為驍騎唐復為左右衛

大將軍各二人

掌宮掖禁禦
督攝隊伍

將軍各二人

貳大將軍事

長史

左右衛各一人晉武帝置左右衛各有長史司馬
東晉省長史歷宋齊梁陳後魏北齊並同至隋左

衛各置長史
一人唐因之

錄事參軍

左右衛各一人東晉元帝初為鎮東大將軍
置錄事參軍自後無梁皇子府有中錄事參

軍錄事參軍各一人後魏二人公府及第一第二第三
品將軍府及始蕃王二蕃王三蕃王府各有錄事參軍
官北齊因之隋左右衛府各
有錄事參軍一人唐因之

倉曹參軍

左右衛各二人東晉元帝為鎮東大將軍有
倉曹參軍宋武帝相府亦置後魏與錄事參

軍同置北齊因之隋左右衛府各有倉曹參軍一人唐因之置二人

兵曹參軍

左右衛各二人歷代皆與倉曹同置

騎曹參軍

左右衛各一人魏司馬景王為大將軍有騎兵宋武帝為相有騎兵參軍隋左右衛府有

騎兵參軍唐初因之其後改為騎曹

冑曹參軍

左右衛各一人東晉元帝為鎮東大將軍有鎧曹參軍宋武帝為相亦有之齊有左右鎧

曹各一人隋左右衛府有鎧曹行參軍事一人唐因之長安初改為冑曹神龍初復為鎧曹開元初復為冑曹凡自十六衛及東宮十率府錄事及兵倉騎冑等曹參軍通謂之衛佐並為美職漢魏以來諸將軍有長史以下官屬及唐諸衛所置蓋亦因其舊號考其資位則全校微矣其下諸衛官屬並同

左右親衛中郎將府

中郎將之名秦漢以來有之隋每衛各置開府一員以統之唐武德

七年改開府為中郎將親衛為一府勳衛翊衛各為一府中郎將各一人掌領校尉以下宿衛總判府事唐武德七年改親衛驃騎將軍為之其勳翊二衛亦然左右郎將一人隋備身府置左右郎將唐因其名武德七年改親衛車騎將軍為之其勳翊二衛亦然掌中郎將之職錄事參軍一人掌受府事兵曹參軍一人掌判府事校尉五人

左右驍衛

漢有驍衛將軍謂之雜號將軍武帝以李廣為之後省後漢初改屯衛為驍騎魏置為中軍晉領營兵兼統宿

衛梁以來其任愈重天監六年置左右驍騎領朱衣直

閣並給儀從北徐州刺史昌義之首為此職出則羽儀

清道入則與二衛通直臨軒則升殿夾侍改舊驍騎曰

雲騎陳有左右驍騎及雲騎

韋翹為驍騎將軍素有名稱每大事常令夾侍左右

時人榮之後魏北齊並有驍騎將軍之職後周有左右驍騎

率上士隋開皇十八年置備身府煬帝即位改左右備

身府為左右驍衛府所領軍士名曰豹騎其備身府又

別置焉唐因隋置左右驍衛府龍朔二年去府字光宅

元年改左右驍衛為左右武威神龍元年復舊大將軍

各一人所掌與左右衛同將軍各二人以副之

領官屬並隋置

唐因之同

左右衛

左右武衛

後漢末曹公為丞相有武衛營及魏文帝乃置武衛將軍以主禁旅晉宋齊梁陳隋又有建武奮武廣武等將軍至隋採諸武之名置左右武衛大將軍一人將軍二人以總府事煬帝改所領軍士名熊騎唐光宅元年改

為左右鷹揚衛神龍元年復為武衛其制與隋同所掌

如左右衛

領官屬並隋置唐因之同左右衛

左右威衛

隋初有領軍府煬帝改為左右屯衛唐因之貞觀十二
年左右屯衛始置飛騎出游幸即衣五色袍乘六閑馬
賜猛獸衣韉而從焉龍朔二年改左右屯衛為左右威
衛而別置左右屯營亦有大將軍等官

尋改左右屯營為羽林

光

宅元年改威衛為豹韜衛神龍元年復舊所掌如左右

衛領官屬並隋置唐因之同左右衛龍朔三年左右威衛舊官之員外各置錄事參軍一人府三人史四人

並隸左右羽林

軍統本司事

左右領軍衛

初魏武為漢丞相相府自置領軍非漢官也建安十二年改為中領軍以史渙為之與護軍韓浩皆領禁兵文帝受漢禪始置領軍將軍以曹休為之主五校中壘武衛三營晉武帝初省使中軍將軍羊祜統二衛前後左右驍騎七軍營兵即領軍之任也祜遷罷復置北軍中

候懷帝永嘉中改中軍曰中領軍元帝永昌元年復改

曰北軍中候尋復為領軍成帝時復以為中候而陶侃

居之尋復為領軍魏晉領護皆金章紫綬中領中護銀

章青綬武冠絳朝服佩水蒼玉

晉郁鑒庾亮紀瞻卞壺陸晔褚翼王彪之曾稽

王道子沈嘉武陵王遵孔安國謝鯤等並為領軍

宋置領軍將軍一人掌內軍

護軍將軍一人掌外軍齊有領軍及中領軍梁領軍將

軍管天下兵要謂之禁司與左右僕射為一流中領軍

與吏部尚書為一流

梁蕭景為領軍將軍管天下兵要監局官僚皆近侍多驕侈景在職

峻切官曹肅然其監局多事唯景及
陳因之後魏有領

軍護軍

二職若侍臣帶者加中

又有領軍將軍護軍將軍二將軍

與領護不並置北齊領軍府凡禁衛官皆主之以高歸
彥為領軍大將軍領軍加大自歸彥始隋有左右領軍

府各掌十二軍籍帳差科辭訟之事不置將軍唯有長

史司馬諸曹掾屬等官煬帝改領軍為左右屯衛

即左右威

衛

唐復採舊名別置領軍衛分為左右龍朔二年改為

左右戎衛咸通元年復舊光宅元年改為左右玉鈴衛

神龍元年復舊各置大將軍一人掌宮掖禁備督攝隊

伍與左右諸衛同將軍各二人以副之

長史齊梁陳並有之北齊有長

史司馬隋置錄事以下諸曹唐因之同左右衛

左右金吾衛

秦有中尉掌徼循京師

如淳曰所謂游徼徼循禁備盜賊也顏師古曰徼謂遮繞

漢

武帝太初元年更名執金吾

顏師古曰金吾鳥名也主辟不祥天子出職主先導

以備非常故執此鳥之象因以名官

緹騎二百人

緹騎無秩比史食俸

五百二十人

輿服導從光生滿路羣僚之中斯最壯矣

光武徵時歎曰仕宦當為

執金吾

舊掌京師盜賊考按疑事後漢掌宫外戒司非常

水火之事

衛尉巡行宮中金吾徼巡宮外相為表裏以擒姦討猾

月三繞行宫外

及主兵器自中興但專徼循不與他政魏武秉政復為

中尉晉初罷直至後周置武環率武侯率下大夫各二

人隋置左右武侯府大將軍一人將軍三人掌車駕出

入先驅後殿晝巡夜察執捕姦非烽候道路水草所宜

巡狩師田則掌其營禁煬帝大業三年改為左右武侯

衛所領士名欽飛

漢百官表曰漢有左弋令武帝太初元年更名欽飛掌弋射屬少府光武

省之隋氏
採舊名

唐初又為左右武侯府龍朔二年改為左右

金吾衛置大將軍一人所掌與隋同將軍二人副其事

領官屬並隋

置唐因之

左右監門衛

隋初有左右監門府將軍各一人掌宮殿門禁及守衛

事各置郎將二人校尉直長各三十人

有長史司馬錄事及倉兵二曹

參軍鑑曹行參軍各十人二漢有城門校尉掌京師城門屯兵非今任也

煬帝改將軍為郎

將各一人正四品署官屬並同備身府唐左右監門府

置大將軍中郎將等官龍朔二年改府為衛大將軍各
一人所掌與隋同將軍各二人以副之中郎將各四人
分掌諸門以時巡檢

領官屬並隋
置唐因之

左右千牛衛

千牛刀名後魏有千牛備身掌執御刀因以名職

謝綽
宋拾

遺有千牛刀即人君防身刀也齊尚書楊玉夫取千牛
刀殺蒼梧王是也其義蓋取莊子云庖丁解牛十九年
所割者數千牛而刀刃若
發於硎因以為備身刀名北齊千牛備身屬左右將軍

隋有左右領左右府大將軍一人將軍二人掌侍衛左

右供御兵仗領千牛備身十二人掌執千牛刀備身左

右十二人掌供御刀箭備身十六人掌宿衛侍從

左右置長

史司馬錄事及倉兵二

曹參軍事鎧曹行參軍

煬帝改左右領左右府為左右

備身府置備身郎將等官唐貞觀中復為左右領左右

府顯慶五年始置左右千牛府龍朔二年改左右千牛

府為左右奉宸衛後改為左右千牛衛神龍二年各置

大將軍一人所掌與隋同總判衛事將軍各一人以副

之中郎將各一人通判衛事

領官屬即隋左右領左右府長史以下唐改之

左

右千牛備身各十二人掌執御刀宿衛侍從

皆以門蔭子弟年少

姿容美麗者補之為

貴冑起家之良選

備身左右十二人

執御刀弓箭箭宿衛侍省

備

身各一百人

掌宿衛侍從

左右羽林軍

漢武太初元年初置建章營騎後更名羽林

象天文羽林星主車

騎也宣帝令中郎將騎都尉監羽林謂之羽林中郎將領

郎百人謂之羽林郎選隴西漢陽安定北地西河上郡

良家子便弓馬者以為之一名巖郎

後漢志曰言從游獵還宿殿階巖下

室中故

號巖郎又置羽林左右監

後漢志曰羽林左監一人主羽林左騎羽林右監一人主

羽林右騎皆六百石

取從軍死事之子孫養之羽林官教以五兵

號曰羽林孤兒光武中興以所征伐士勞苦者為之其

後復簡五營高手別為左右監羽林父死子繼與虎賁

同所居之處謂之寺

延熹六年減虎賁羽林郎住寺不任事者半俸

二漢並屬

光祿勳

後漢竇固鄧彪並為羽林

魏羽林左右監與漢同

夏侯太初為右桓範

為左晉罷羽林中郎將又省一監置一監而已哀帝省宋

武帝永初初復置江右領營兵江左無復營兵羽林監

及虎賁中郎將並銅印墨綬武冠絳朝服其在陞列則

鷩尾冠

鷩鳥每闕死不止

絳紗縠單衣江左不復著鷩冠齊因

之後魏有羽林監北齊置監十五人後周有左右羽林
率屬大司馬隋煬帝改左右領軍為左右屯衛所領兵
為羽林唐貞觀十二年於元武門置左右屯營以諸衛
將軍領之其兵名曰飛騎又於飛騎中簡材力驍捷善
射者號為百騎扈從游幸則衣五色袍乘六閑馬賜猛
獸衣韞龍朔二年改左右屯營為左右羽林軍武太后

臨朝永昌元年改百騎為千騎天授中改軍為衛中宗

景龍元年改千騎為萬騎大將軍一人

大足元年左右羽林衛各增置

將軍一人所掌與左右衛同將軍各三人以副之

領官屬並唐置

左右龍虎軍

左右神虎軍附

唐之初有禁兵號為百騎屬羽林永昌元年改羽林百騎為千騎景龍元年改千騎為萬騎仍分為左右營開元二十六年析羽林軍為左右龍虎軍以左右萬騎營隸焉官屬並唐置至德中分置左右神虎軍各置官屬

如羽林之制

武官第八下

大將軍

并官屬

大將軍

戰國時官也楚懷王與秦戰秦敗楚虜其大將軍屈平是矣漢高帝以韓信為大將軍武帝又

置初武帝以衛青數征伐有功以為大將軍欲尊寵之故置大司馬官號以冠之青為車騎將軍擊匈奴有功引兵還帝使使者持大將軍印即軍中拜青為大將軍位在公上又加青大司馬位冠於大將軍上共為一官後霍光王鳳等皆然成帝綏和二年賜大司馬印綬罷將軍官後漢光武時吳漢以大將軍為大司馬時以大將軍自為一官其大司馬不加於其上而帝時以寧憲為之舊大將軍位在三公下置官屬依太尉憲威權震

朝廷公卿希旨奏憲位次太傅下三公上長史司馬秩中二千石從事中郎二人六百石自下各有增自安帝政治衰缺始以嫡舅耿璠為大將軍常在京都順帝即位又以皇后父兄弟相繼為大將軍如三公漢末猶在三公上魏武為大將軍袁紹為太尉紹恥班在下魏武乃因以大將軍推紹魏黃初中又有上大將軍以曹真為之明帝青龍三年晉宣帝自大將軍為太尉然則大將軍在三司下矣其後又在三司上自漢東京大將軍不常置為之者皆擅朝權至晉景帝為大將軍亦受非常之任後以叔父孚為太尉奏改大將軍在太尉後位次三司下後復舊在三司上太康元年琅邪王伷遷大將軍復制在三司下伷薨復如舊冠綬珮服與大司馬同宋唯彭城王義康為之章綬冠珮亦與晉同齊以為贈梁有之陳以為贈後魏北齊為二大與大司馬同後周建德四年增置上大將軍隋並以為武散官不治事上大將軍從二品大將軍正三品唐貞觀二年九月勅

六軍先已各置統軍一人今十六衛宜各置上將軍一人秩從二品漢不見官屬後漢大將軍驃騎將軍車騎將軍衛將軍有長史一人司馬一人從事中郎二人掾屬二十九人令史及御屬三十一人又賜官騎四十人

及鼓吹其領軍皆有部曲大將軍營五部部校尉一人軍司馬一人部下曲曲有軍候一人曲下有屯屯長一人其不置校尉部但有軍司馬一人其別營領屬為別部司馬其多少各隨時宜門有門候魏以司馬景王為大將軍掾十人則無屬官其驃騎車騎府有長史司馬晉驃騎衛將軍伏波撫軍都護鎮軍中領四征四鎮龍驤典軍上軍輔國等大將軍開府者皆為位從公品秩俸賜亦與諸公同加兵者增置司馬一人從事中郎二人主簿記室督各一人官屬並與公同後周有大將軍長史司馬中郎掾屬諸曹參軍典籤等員隋以後無

車騎將軍

漢文帝元年始用薄昭為車騎將軍灌嬰周亞夫金曰碑並為之後漢章帝時西羌反以

舅馬防行車騎將軍征之銀印青綬在卿上絕席還復
罷和帝即位以舅竇憲為車騎將軍征匈奴始賜金紫
次司空安帝即位西羌寇亂以舅鄧騭為車騎將軍征
之數年復罷靈帝數以拜嬖臣又以贈之魏車騎為都
督儀與四征同若不為都督雖持節屬四征者與前後
左右雜號將軍同其或散還從文官之例則位次三司
晉宋車騎衛不復為四征所督故羊祐為車騎將軍開
府如三司之儀後魏制與驃騎同隋車騎屬驃騎府唐
之省

衛將軍

漢文帝始用宋昌為衛將軍位亞三司其官屬
附見大將軍後凡驃騎車騎衛三將軍皆金印

紫綬武冠絳朝服佩水蒼玉晉以陸燁為衛將軍魚儀
同三司加千兵百騎東晉已後尤為要重後魏初加大
則次儀同三司孝文太和中制加大則
位在太子太師上歷代多有唐無之

前後左右將軍

皆周末官秦因之位上卿金印紫綬漢不常置或有前後或有左右皆掌兵及

四夷李廣為前將軍趙充國為後將軍辛慶忌王商為左將軍馮奉世為右將軍光武建武七年省魏以來復置晉武初又置前軍左軍右軍泰始八年又置後軍是為四軍齊亦號左右前後四軍陳並有之北齊左右將軍領千牛備身唐無

四征將軍

皆漢魏以來置加大者始曰方面征東將軍漢獻帝初平三年以馬騰為之或云以張遼

為之征西將軍光武建武中以馮異為征西大將軍征南將軍建武二年置以馮異為之亦以岑彭為征南大將軍征北將軍魏明帝太和中置劉靖為之魏黃初中位次三公後魏加大則次衛將軍唐無

四鎮將軍

鎮東將軍後漢末魏武帝為之鎮南將軍後漢末劉表為之魏張魯晉杜預並為之鎮西

將軍後漢劉表為之魏鍾會鄧艾並為之鎮北將軍魏明帝太和中置劉靖許允並為之宋時四鎮與中軍為

雜號後魏加大

次尚書令唐無

四安將軍

安東將軍後漢陶謙曹休並為之安南將軍光武元年始以岑彭為之安西將軍後漢末

段熲魏鍾會石鑒並為之安北將軍晉以郝鑒為之後魏亦有唐無

四平將軍

平東將軍晉杜預王濬等為之平南將軍晉盧欽羊祐胡奮等為之平西將軍晉嵇紹為

之平北將軍漢獻以張燕晉以阮坦為之並漢魏間置後魏亦有之唐無

雜號將軍

歷代雜號將軍凡數百不可具載今錄其著者上將軍漢以呂祿為之騎將軍漢武帝

以公孫敖及公孫賀為之樓船將軍漢元封三年以荀彘為之橫海將軍漢元鼎六年以韓說為之擊東

越有功材官將軍漢李息為之掌治宮室戢師將

軍李廣利為之征貳師城取善馬故以為號輕車將

軍漢武以公孫賀為之後漢伏波將軍漢武帝征南越始

置此號以路博德為之後漢馬援亦為之伏波者船涉

江海欲使波浪伏息中軍將軍漢武帝以公孫敖為

之彊弩將軍漢武帝以李沮為之戈船將軍環氏

要略云建戈於船上浮渡沮水以討北狄奮威將軍

漢武帝以田千秋為之度遼將軍漢武帝初以范明

友為之後漢明帝永平八年又置屯五原銀印青綬

積射將軍漢有之晉武帝泰始四年省太康十五年立

射營弩營置積射彊弩將軍主之建威將軍漢元帝

以韓安國王晏並為之九虎將軍王莽拜將軍九人

皆以虎為號號九虎將軍征虜將軍後漢建武中始

以祭遵為之後張飛亦為之虎牙將軍後漢光武以

蓋延為之橫野將軍漢光武以王常為橫野大將軍

位與諸將絕席捕虜將軍後漢永平中馬武為之

應揚將軍後漢建安中魏武以曹洪為之破虜將軍
後漢末以孫堅為之討逆將軍後漢以孫策為之
討虜將軍後漢末以孫權為之安漢將軍蜀麋竺為
之班在軍師將軍之右武威將軍魏武帝以于禁為
之撫軍將軍魏武帝置以司馬懿為之凌江將軍
後漢置初以羅獻為之寧朔將軍魏以王渾為之
橫江將軍吳魯肅為之龍驤將軍晉武帝始以王濬
為之殿中將軍宋初置之黑稍將軍後魏于栗磾
好持黑稍以自衛劉裕書與之曰黑稍公麾下明帝因
授黑稍將軍牙門將軍冠服與將軍同魏文帝黃初
中置明帝以胡烈為之又王隱晉書云陸機少襲父為
牙門將吳人重武官也故晉惠帝特置四部牙門以汝
南王祐為之蜀
以趙雲為之

監軍

齊景公使穰苴將兵捍燕晉之師穰苴願得君之
寵臣以監軍公使莊賈往賈不時至苴斬之是其

始也漢武帝置監軍使者光武以來歛監諸將後漢末
劉焉以監軍使者領益州牧劉璋亦為監軍使者魏晉
世皆有之魏時司馬昭征壽春石苞為監軍鍾會伐蜀
衛瓘為監軍晉孟康持節監石苞諸軍事初隗囂軍中
嘗置軍師罵聘平陵人方望為之又袁紹請盧損為軍
師至魏武帝又置師官四人以荀攸為軍師軍國選舉
及刑獄法制皆使決焉又梁義為左軍師吳朱然為右
軍師蜀以諸葛亮為軍師將軍晉避景帝諱改為軍司
凡諸軍皆置之以為常員所以節量諸軍亦監軍之職
也而太尉軍司尤重故山公啓事曰太尉軍司缺當選
上宰監宜得宿有資重者也宋齊以來此官頗廢至梁
大通四年元法僧北討復以羊侃為其太尉軍司後代
多不置至隋末或以御史監軍事唐亦然時有其職非
常官也開元二十年後並以中官為之謂之監軍使
軍師祭酒後漢建安三年曹公還許初置此官理曹
掾屬後漢建安十九年魏武令曰軍中典獄者或非其

人而任以三軍死生吾甚懼之
遂署此選明達法理者為之

三署郎官叙

漢中郎將分掌三署郎有議郎中郎

皆北六
百石

侍郎

北四
百石

郎中

北三
百石

凡四等皆秦官無員多至千人

漢靈帝時三
署郎吏二千

餘人皆掌門戶出充車騎

其散郎謂
之外郎

故卿校尉牧守待價

於此公車特召賢良方正敦樸有道高節公府掾曹試

博士者亦充茲位其下第白衣試博士者皆拜郎中中

郎有五官左右三將

謂五官中郎
將左右郎將

郎中有車戶騎三將

如淳曰主車曰車郎主戶衛曰戶郎漢舊儀曰郎中令主郎中左右車將主左右車郎左右戶將郎主左右戶

郎

凡郎官皆主更直執戟宿衛諸殿門唯議郎不在直

中

漢儀曰三署郎見光祿勳執版拜見五官左右將執版不拜於三公諸卿無敬

郎官故事令

出錢市財用給文書乃得出時號曰山郎

謂以資財為郎山者財用

所出故名

貧者或至經歲不得休沐其豪富郎日出遊戲或

行錢得善部貨賂流行轉相放效楊惲為中郎將罷山

郎其疾病休沐皆以法令有過奏免薦舉其高第有行

能者多至郡守九卿三署化之莫不自勵宮殿之內翕

然同聲其後遂以為常

後漢和帝永元元年初令郎官詔除者得占丞尉以比秩為真

凡三署郎官二漢並屬光祿勳光祿選三署郎有行應

四科者歲舉茂才二人四行二人又上廉吏六人為長

治劇隨缺多少萬戶以上為劇縣其缺少者不選公府

亦然故明帝時館陶公主為子求郎帝不許賜錢千萬

曰夫郎官上應列宿出宰百里有非其人人受其殃

後漢

桓靈間三署見郎七百餘人而郡國計吏多留拜為郎
太尉楊秉上疏諫曰先王建國順天制官太微積星名
為郎位入奉宿衛出牧百姓云云按自近代皆謂郎官
上應列宿出宰百里為尚書郎故事且夫天有虎賁郎

位等星皆在太微帝座之後為珥衛之象則三署郎也而世人謂之尚書郎則誤矣徵其失也蓋自梁陶藻職官要錄以漢三署郎郎故事通為尚書郎郎舊有郎中將右騎光武中興悉省

之晉議郎遷為太守

山公啓事曰議郎許允宜參廣漢太守選

亦有郎中等

官其後雖有中郎將等官而無三署郎矣

中郎將五官左右中郎將

皆秦官漢因之並領三署郎後漢郡國舉孝廉以補之三

署郎年五十以上屬五官後漢黃琬為五官中郎將時陳蕃為光祿勳深相禮待每與議事舊制光祿舉三署郎以功高久次才德尤異為茂才四行時權富者多以人事得舉而安貧守志者見遺京師謠曰欲得不能光祿茂才於是蕃琬同心顯用志士故皆為權富郎所中傷其次分屬左右署左右郎將各領左右署郎二署皆

有中郎侍郎郎中三郎並屬光祿勳魏無三署郎猶置左右中郎將晉武帝省左右中郎將官宋孝武大明中復置銀章青綬武冠絳朝服佩水蒼玉齊左右中郎將屬西省梁代並分司丹禁唐亦置諸衛中郎將永徽三年八月避太子名改中郎將為旅賁郎將又改為翊軍郎將尋復舊

虎賁中郎將

周官有虎賁氏掌領虎士八百人漢武帝建元三年初置期門北郎中蓋以微行出

游選材力之士執兵從送期之諸門故名期門無員多至千人平帝元始元年更名虎賁郎舊曰虎賁言如虎之奔置中郎將領之故有虎賁中郎將主虎賁宿衛冠挿兩鷩尾鷩鷩鳥中之果勁者尾上黨所貢後漢崔鈞為虎賁中郎將武弁戴鷩尾紗縠單衣虎文錦袴餘郎亦然凡有虎賁中郎虎賁侍郎虎賁郎中節從虎賁皆父死子繼若死王事亦如之前賢亦多為者後漢馬援孔融並為虎賁中郎將魏桓階為虎賁中郎將遷尚書

典選
唐無

東西南北四中郎將

東中郎將後漢靈帝以董卓為之
南中郎將漢獻帝以臨淄侯曹植

為之西中郎將晉以謝曼桓沖為之北中郎將後漢以
盧植為之建安中以鄢陵侯曹彰為之按此四中郎將
並後漢置江左彌重或領刺史或持節為之銀印青綬
服同將軍後魏靈太后時四中郎將兵數寡弱不足以
襟帶京師任城王澄奏宜以東中帶滎陽郡南中帶魯
陽郡西中帶弘農郡北中帶河南郡選一品三品親賢
兼稱者居之配以彊兵則深根固本之計也靈太后初
從之後復止唐至德後節度都團練使殆其遺職也

雜中郎將

匈奴中郎將後漢主護南單于以張奐為之
後魏天興四年罷平越中郎將晉武帝置治

廣州主護南越司金中郎將趙王循
為之武衛中郎將魏始以許褚為之

折衝府

隋初左右衛左右武衛左右武候各領軍坊鄉團以統戎卒開皇中置驃騎將軍每府置驃騎

車騎二將軍大業三年改驃騎府為鷹揚府改驃騎將軍為鷹揚郎將改車騎將軍為鷹揚副郎將五年又以鷹揚副郎將為鷹擊郎將九年別置折衝果毅及武勇雄武等郎將官以統領驍果至唐初猶有驃騎府及驃騎車騎將軍之制武德七年乃改驃騎為統軍車騎為別將貞觀中復採隋折衝果毅郎將之名改統軍為折衝都尉別將為果毅都尉其府多因其地各自為名無鷹揚之號凡五百七十四府分置於諸州而名隸諸衛及東宮率府各領兵滿一千二百人為上府千人為中府八百人為下府每府置折衝都尉一人左右果毅都尉各一人別將一人長史一人兵曹一人校尉六人凡府在赤縣為赤府在畿縣為畿府衛士以三百人為團團有校尉五十人為隊隊有正十人為火火有備每歲十一月以衛士帳上于兵部以候調發天下衛士向六

十萬人初置以成丁而入六十出役其家不免王徭遂漸逃散年月漸久逃死者不補天寶八載五月停折衝府以無兵可校故也十一年八月改諸衛士為武士

奉車駙馬騎三都尉奉朝請

三都尉並漢武帝元鼎二年置舊無員或以冠常侍

或卿尹校尉左遷為之奉車掌御乘輿車駙馬掌駙馬駙副也非正駕車者駙都尉本監羽林騎奉朝請者漢律諸侯春日朝秋日請後漢並屬光祿勳奉朝請無員本不為官東京罷省三公外戚皇室諸侯多奉朝請謂但奉朝會請召而已晉武帝亦以皇室外戚為三都尉奉朝請元帝為晉王以參軍為奉車都尉掾屬為駙馬都尉行參軍舍人為騎都尉皆奉朝請後罷奉車騎二都尉唯留駙馬都尉奉朝請諸尚公主者若劉惔桓溫等皆為之宋武帝永初以來以朝請選雜其尚公主者唯拜駙馬都尉齊武帝永明中奉朝請至六百餘人梁

三都尉並無員秩其奉車駙馬皆武冠絳朝服銀印青綬梁陳駙馬皆尚公主者為之後魏駙馬都尉亦為尚公主官雖位高卿尹而此職不去奉車二十人騎都尉六十人北齊駙馬與後魏同隋開皇三年罷奉朝請煬帝時奉車駙馬並廢唐駙馬都尉從五品皆尚主者為之開元三年勅駙馬都尉從五品階宜依式仍備紫金魚袋天寶已前皆以美儀容者充選奉車都尉五員掌馭副車不常置若大備陳設則以餘官攝行屬左右衛

東宮官第九

東宮官序

太子六傳

三少

賓客

詹事

丞

主簿

庶子

中允

議郎

中舍人

舍人

通事舍人

諭德

贊

善

崇文館學士

洗馬

文學

校書

正字

典膳郎

藥藏郎

內

直郎

典設郎

宮門郎

家令

率更令

僕

左右衛率府

副率以下官屬

左右司禦率府

左右清道

率府

左右監門率府左右內率府

旅賁中郎將

太孫官屬

東宮官序

凡三王教世子必立太傅少傅以資之太傅則示之以

父子君臣之道少傅則奉世子以觀太傅之德行而審

諭之太傅在前少傅在後

謂其在學時也

入則有保出則有師

謂燕居出入時也漢班彪上書曰昔成王為孺子出則周公召公入則太顛閎夭南宮适散宜生左右前後皆

正之以禮師也者教之以事而諭諸德者也保也者慎其身

以輔翼之而歸諸道者也秦漢以下始加置詹事中庶子及諸府寺等官亦有以他官而監護者自魏明帝以後久曠東宮制度闕廢官司不具

吳孫權卽位孫登為太子魚置四友等官

以諸葛恪為左輔張休為右弼顧譚為輔正都尉陳表為翼正都尉是為四友於是東宮號為多士晉初

詹事左右率庶子中舍人諸官並未置唯置衛率令典兵二傳并攝衆事至咸寧元年始置詹事以領宮事宋武置東宮率更令等官其中庶子庶子中舍人舍人洗馬各減舊員之半後周加置太子諫議員四人至隋罷

詹事分東宮置門下坊典書坊

北齊已有典書坊

以分統諸局

北門下內史二省

門下坊有左庶子二人內舍人四人錄事二

人統司經宮門內直典膳藥藏齋師等六局典書坊有
右庶子二人舍人通事舍人各八人領內坊唐置詹事
府以統衆務置左右二春坊以領諸局左春坊置左庶
子二人中允二人司議郎四人錄事二人左諭德一人
左贊善大夫五人崇文館校書二人亦統六局右春坊
置右庶子二人中舍人二人舍人四人錄事二人右諭

德一人右贊善大夫五人通事舍人八人兼領內坊因隋制也

臣謹按漢孝宣帝欲令中郎將監護太子家疏廣以為示狹非所以廣太子也後漢順帝立太子居承光宮以侍御史种暲監護有中常侍卒乘衣車來載太子太子太傅高寢憂懼不能止開門將出而暲至手劔當車曰太子國之儲副常侍來無尺一何以得將太子去今日之事有死而已乃遣寢詣臺啓白得中

決勅乃聽之

太子六傳

太子師傳商周已有逮乎列國秦亦有之漢高帝以叔孫通為太子太傅位次太常後亦

有少傅後漢太傅禮如師不領官屬而少傅主太子官屬漢魏故事太子於二傅執弟子禮皆為書不曰令少傅稱臣而太傅不臣吳薛綜綜子瑩瑩子魚三代並為太子少傅晉泰始三年武帝始建東宮各置一人尚未置詹事官事無大小皆由二傅少傅立草太傅書真以為儲訓並有功曹主簿五官秩與後漢同皇太子先拜諸傅然後答之如弟子事師之禮二傅不得上疏曲敬武帝後以儲副體尊遂命諸公居之以本位重故或行或領時侍中任愷武帝所親敬復使領之蓋一時之制也咸寧元年以給事黃門侍郎楊琰為詹事掌宮事二傅不復領官屬及楊琰為衛將軍領少傅復省詹事遂崇廣傅訓命太尉賈充領太保司空齊王攸領太傅所

置吏屬復如舊二傳皆進賢兩梁冠黑介幘五時朝服
佩水蒼玉其後太尉汝南王亮車騎將軍楊駿司空衛
瓘石鑒皆領傳保猶不置詹事以終武帝之世惠帝元
康元年復置詹事及愍懷太子建宮乃置六傳三太三
少焉晉二傳給采田六頃田駒五十人夏後不及田者
食俸一年給赤耳安車一乘又晉書曰東宮舊制月請
錢五十萬以備衆用景帝諱師故改太師為太帥通省
尚書事詹事文書關由六傳自元康之後諸傳或三或
四或六渡江之後有太傳少傳不立師保宋有太傳少
傳各兼丞一人其保傳並銀章青綬齊與宋同武帝時
以王儉為少傳舊太子致敬二傳同至是朝議接少傳
以賓友之禮梁太傳位視尚書令少傳視左僕射陳因
之自宋以下唯有傳而無師保後魏有太師太傳太保
謂之東宮三師少師少傳少保謂之東宮三少北齊皆
有之出則三師在前三少在後後周不置隋與北齊同
唐六傳不必備唯其人太子出則乘輅備儀以為後從

臣謹按後魏孝明在東宮宣武皇帝以崔光為太子
傅光固辭帝令太子南面再拜宮臣皆從太子拜光
北面立不敢答拜唯西面拜謝而出乃授光太子少
傅又按唐貞觀中太宗撰太子接三師之儀出殿門
迎太子先拜三師答拜每門讓三師坐與三師書前
名皇恐後名皇恐再拜

太子賓客

漢高帝時有四人年老以上慢侮逃匿山中
義不為漢臣謂之四皓東園公綺里季夏黃

公角里先生高帝不能致及將廢太子太子致禮而四
人至鬚眉皓白衣冠甚偉高帝異之太子由是不廢至

孝武帝又為太子立博望苑使通賓客晉元康元年愍懷太子始之東宮惠帝詔曰太保衛瓘息庭司空隴西王泰息畧太子太傅楊濟息蔭太子少師裴楷息憲太子少傅華廙息恒五人與太子往來以備賓客時雖非官而謂之東宮賓客其後無聞唐顯慶元年正月以太子太傅兼侍中韓瑗中書令來濟禮部尚書許敬宗左僕射兼太子少師于志寧並為皇太子賓客遂為官員定置四人掌調護侍從規諫凡太子有賓客之事則為上齒蓋取象於四皓焉資位閑重其流不雜天寶中賀知章自太子賓客度為道士還鄉舍宅為觀明皇賦詩贈別時

議榮之

太子詹事

秦官漢因之掌皇后太子家漢時太子門大夫庶子洗馬舍人皆屬二傳其太子家令丞

率更令丞僕中盾衛率等官並屬詹事後漢省詹事而太子官悉屬少傅魏復置詹事領東宮衆務晉不置至

咸寧元年復置以掌宮事及永康中復不置自大安以來又置終孝懷之世晉職擬尚書令掌三令四率中庶子庶子洗馬舍人等官銀印青綬介幘進賢兩梁冠絳朝服佩水蒼玉宋與晉同齊置府領官屬梁陳任總宮朝後魏有太子左右詹事北齊東宮家事無大小皆統之領三寺二坊又左右衛後周置太子宮正宮尹隋開皇初置詹事二年罷之唐復置詹事一人掌內外家務糾彈非違總判府事置少詹事一人以貳之龍朔二年改詹事為端尹詹事府為端尹府少詹事為少尹咸通初復舊垂拱元年又改詹事為宮尹少詹事為少尹神龍初復舊

臣謹按漢皇后太子各置詹事隨其所在以名官漢官儀曰詹事位在長秋上亦宦者主中諸官後漢志

曰初成帝鴻嘉三年省詹事職并大長秋是後皇后
當法駕出則中謁中宦者職史權兼詹事奉引訖罷
宦者誅後尚書選兼職史一人奉引此皆皇后詹事
也

丞 秦官漢因之後漢省魏晉皆隨詹事省置至晉永康
中詹事特置丞一人掌文書闡通六傳過江多用員
外郎及博士為之遷尚書郎宋齊因之梁陳制一梁冠
阜朝服銅印墨綬後魏北齊並有之隋初置一人唐置
二人掌文武官簿帳
朝集假使分判府事

臣謹按後魏楊昱為詹事丞孝明為太子尚在懷抱

其所出入唯乳母而已不令宮僚聞知昱諫曰太子動止宜令翼從陛下若召太子必降手勅令臣下咸知乃詔曰自此已後非朕手勅勿令兒出宮宮臣在直從至萬歲門

主簿

一人晉始置歷代皆有掌府事及三寺十率府文符之隱漏程限稽失者

司直

二人唐龍朔三年置桂坊北御史臺置令一人北大夫司直二人北侍御史掌彈劾官府察其後廢

桂坊以司直

隸詹事府

太子庶子

古者天子有庶子之官周官謂之諸子職諸侯卿大夫之庶子掌其戒令與其教治有大

事則帥國子而致於太子唯所用之秦因之置中庶子庶子員漢因之有庶子員五人史丹王商歐陽地餘並為中庶子王莽改曰中尚翼子後漢員五人職如侍中而庶子無員職如三署中郎凡庶子主宮中并諸吏之適子及支庶版籍魏因之在吳為親近之官張溫言於孫權曰中庶子官最親密切問近對宜用雋選由是以顧譚為之晉中庶子庶子各四員職比散騎常侍及中書監令皆以俊茂者為之或以郡守參選若釋奠中庶子扶左庶子扶右宋與晉同武冠平巾幘絳朝服元嘉初詔二率中庶子隨太子入直上宮十四年又詔還直東宮至齊其庶子用人卑雜梁天監七年詔革選其年以太子中舍人司徒從事中郎為之凡中庶子四人以功高者一人為祭酒行則負璽前後部護駕與功高中舍人一人共掌其坊之禁令庶子四人掌侍從左右獻納得失與功高通事舍人一人共掌其坊之禁令冠服並同前代陳因梁制後魏亦有中庶子庶子官北齊門

下坊中庶子四人領之典書坊庶子四人領之隋分為左右庶子各二人分統門下典書二坊事唐亦各二人分掌左右春坊事左擬侍中而右擬中書令中允司議郎司經洗馬文學校書正字典膳藥藏內直典設宮門等局郎丞崇文館屬右春坊中舍人舍人通事舍人並屬左春坊其諭德贊善亦左右分隸焉

中允

後漢太子官屬有之職在中庶子下洗馬上漢制太子五日一朝其非朝日即使僕及中允朝朝請

問起居其後無聞宋齊有中舍人是其職也唐貞觀初改太子中舍人為中允置二員其後復置中舍人龍朔二年又改中允為左贊善大夫咸亨元年復為中允而左贊善仍置焉中允掌侍從禮儀駁正啓奏并監藥及通判坊局事若庶子闕則監封題職擬黃門侍郎

司議郎

唐貞觀五年皇太子上表請置史職用司箴諷乃於門下坊置太子司議郎四人精選名士以

居之掌侍從規諫駁正啓奏并錄
東宮記注分判坊事職擬給事中

中舍人

晉咸寧初置四人以舍人才學之美者為之與中庶子共掌文翰在中庶子下洗馬上凡奏事

文書皆綜典之監和嘗藥月檢奏直臣名更直五日典文疏如中書郎宋亦四人齊有一人梁時功高者一人與中庶子祭酒共掌其坊之禁令陳因之後魏北齊共有之隋曰內舍人四員屬門下坊煬帝減二人唐中舍人二員掌侍從令書奏疏通判坊事擬中書侍郎或謂之太子中書舍人

舍人

秦官也漢因之北郎中選良家子為之後漢無員更直宿衛如三署郎中魏因之晉有十六人職比

散騎中書侍郎從駕則正直從次直守妃出次直從宋有四人齊有一人梁有十六人掌文記陳因梁制後魏亦有之北齊典書坊置二十人隋典書坊有八人煬帝改為管記舍人減四員唐復為太子舍人四人掌侍從

表啓宣行令
古分判坊事

通事舍人

齊中庶子下有內典書通事舍人二人掌宣傳令旨

內外啓奏梁亦有之視南臺御史多以餘官兼職陳因
之北齊門下坊有通事舍人八人至隋亦有之煬帝改
為宣令舍人八員唐復為通事舍人
亦有八員掌引導辭見承旨勞問

左右諭德

唐龍朔三年初置太子左右諭德各
一員掌侍從贊諭職比右散騎常侍

左右贊善大夫

唐龍朔二年初置左贊善大夫替中允
置右贊善大夫替中舍人咸亨元年中

允舍人復舊而贊善大夫別自為官左
右各五人皆掌侍從翊贊比諫議大夫

崇文館學士

魏文帝始置崇文館以王肅為祭酒其後
無聞唐貞觀中置崇賢館有學士直學士

員掌經籍圖書教授諸王屬左春坊龍朔二年改司經局為桂坊管崇賢館而罷隸左春坊兼置文學四員司直二員司直正七品上職為東宮之憲司府門北向以象御史臺其後省桂坊而崇賢又屬左春坊後沛王賢為皇太子避其名改為崇文館其課試舉選與弘文館同

洗馬

秦官漢亦曰先馬如淳曰前驅也國語曰勾踐親為夫差先馬先或作洗後漢員十六人職如謁者

太子出則當直者前驅導威儀也漢選郎中補之安帝時太子謁廟洗馬高山冠非乘從時著小冠魏因之晉有八人職如謁者准祕書郎集賢一梁冠黑介幘絳朝服宋與晉同齊置一人梁有典經局又置八人掌文翰尤為清選皆取甲族有才名者為之位視通直郎陳因之北齊典經坊洗馬二人隋曰司經局置洗馬四人煬帝減二人唐司經局洗馬二人龍朔二年改洗馬為司經大夫三年改司經局為桂坊一云折司經局置桂坊

司經大夫通判坊事罷隸左春坊咸亨初復舊掌侍奉及經史圖籍判局事

臣謹按梁庾於陵拜洗馬舍人舊東宮官屬通為清選洗馬掌文翰尤其清者近代用人皆取甲族有才名者時於陵周捨並擢充斯職武帝曰官以人而清豈限於甲族時論美之

文學

漢時郡及王國並有文學而東宮無聞魏武為丞相以司馬宣王為太子文學自後並無後周建德

三年置太子文學十人後省唐龍朔三年置太子文學四員屬桂坊桂坊廢而屬司經開元中定制為三員掌

侍奉分掌四部

書判書功事

校書

宋孝建中洗馬有校書吏四人自後無聞北齊有太子校書隋太子校書有六人唐四人掌讐校經

籍無郎字初弘文崇文二館置讐校開元六年省讐校置校書弘文四員崇文二員

正字

隋太子正字二員煬帝改為正書唐復為正字亦置二人掌刊正文字

典膳郎

漢魏以來並有太子食官局至北齊門下坊始別置典膳局有監丞各二人隋如北齊之制唐

典膳局有郎二人丞二人郎掌進膳嘗食之事丞貳之

臣謹按唐乾封元年皇太子久在內不出典膳丞邢

文偉減膳上啓曰竊見禮大戴記曰太子既冠成人

免於保傅之嚴則有司過之史虧膳之宰史之義不

得不書過不書則死之宰之義不得不撤膳不撤則死之近代以來未甚談議不接謁見常三朝之後但與內人獨居何由發揮聖智使睿哲文明者乎今史雖闕官宰當奉職忝備所司不敢逃死謹守禮經遽申減膳其年右史闕宰臣進擬數人高宗曰邢文偉嫌我兒不讀書不肯與肉喫此人甚直可用遂拜焉

藥藏郎

北齊門下坊領藥藏局有監丞各二人侍藥四人隋如齊之制唐藥藏局有郎二人丞二人郎

掌和劑醫藥之事丞貳之

內直郎

齊有太子內直兵局內直兵史二人梁有齊內主壘主衣扶侍等局各置有司以丞其事陳因

之北齊門下坊領殿內局有內直監二人副監四人隋如北齊制唐內直局有郎二人丞二人掌符壘繳扇几杖衣服之事丞貳之

典設郎

南齊置齊居局齊居庫郎一人梁有齊內局各置有司以丞其事陳因之北齊門下坊有齊局

有太子齋內閣帥內閣帥各二人隋如北齊制唐典設局有郎四人掌凡大祭祀湯沐灑掃鋪陳之事

宮門郎

秦有太子門大夫漢因之員二人職比郎將漢官儀曰門大夫選四府掾屬為之安帝時太子

謁廟門大夫乘從冠兩梁冠魏因之晉太子門大夫准公車令掌通牋表及宮門禁防宋因之梁代視謁者僕射陳因之北齊謂之門大夫坊并統伶官隋煬帝改門大夫為宮門監唐初為宮門大夫後為宮門局有郎二

人丞二人即掌東宮殿門
管鑰及啓閉之事丞貳之

太子家令

家令秦官屬詹事太子稱家故曰家令漢因之有丞主倉穀飲食職似司農少府漢代太

子食湯沐邑十縣家令主之後漢則屬少傅主倉穀飲
食魏因之晉又兼主刑獄職比廷尉司農少府其家令
率更令及僕射為太子三卿太康八年進品與中庶子
二率同自漢至晉家令在率更下宋則居上銅印墨綬
進賢兩梁冠絳朝服主內茵褥牀几諸供中之物及官
奴婢月用錢庫內鹽米車牛刑獄齊因之自宋齊以來
清流者不為之至梁天監六年武帝以三卿陵替乃詔
革選家令視常侍率更僕視黃門陳因之後魏亦曰三
卿北齊詹事領家令有丞功曹主簿領食官典倉司藏
等三署及領內坊令丞隋掌刑法食膳倉庫奴婢等煬
帝改為司府令唐復為家令寺置家令一人唯不主刑
法餘與隋同丞二人主簿一人領食官署典倉署司藏

署署令各一人
丞各二人

太子率更令

率更令秦官顏師古曰掌知漏刻故曰率更漢因之有丞主簿庶子舍人更直職似

光祿勳而屬詹事後漢因之為太子少傅屬官魏因之
晉主宮殿門戶及賞罰事銅印墨綬進賢兩梁冠絳朝
服宋齊因之梁陳後魏並有北齊領中府署掌周衛禁
防漏刻鐘鼓亦屬詹事隋掌伎樂漏刻有令丞錄事各
一人唐因之加掌皇族次序
及刑法事丞主簿各一人

太子僕

僕秦官漢因之又有長丞主車馬又有太子廄
長一人亦主車馬後漢因之而屬少傅職如太

僕太子五日一朝其非太子朝日即與中允入問起居
魏因之晉主興馬兼主親族如太僕宗正從駕乘安車
次家令而屬詹事宋齊並有之梁視黃門郎陳因之後
魏亦有北齊詹事領僕寺置令丞功曹主簿領廄牧署

令隋僕寺置僕一人掌皇族親疎車輿騎乘領廐牧署
令丞唐因之加掌儀伏喪塋而不掌親族丞主簿各一
人統廐牧署廐牧有令一人丞
二人掌車馬閑廐畜牧之事

左右衛率府

衛率府秦官漢因之屬詹事後漢主門衛
徵循衛士而屬少傅魏因之晉武帝建東

宮置衛率初曰中衛率泰始五年分為左右衛率各領
一軍惠帝時愍懷太子在東宮又如前後二衛率晉志
曰凡太子出前衛率導在前黃麾左右二率從夾導與
車後衛率從在烏皮外並帶戟執刀成都王穎為太弟
又置中衛率是為五率及江左省前後率孝武太元中
又置宋齊止置左右二率梁二率視御史中丞銅印墨
綬武冠絳朝服左率領七營右率領四營陳有一率後
魏曰左右衛率北齊謂之左右衛率坊後周東宮有司
戎司武司衛等員隋曰左右率兼有副率二人煬帝改
左右衛率為左右侍率兼置副率二人唐為左右衛率

府龍朔三年改其府為左右典衛咸亨元年復舊置
率各一人領兵宿衛督攝隊伍總判府事副率二人長
史錄事及倉兵胄曹參軍各一人
親府勳府翊府中郎將各一人

臣謹按晉劉卞為愍懷太子左率知賈后欲害太子
乃問張華華曰君欲如何卞曰東宮儁又如林四率
精兵萬人公居阿衡之任若得公命皇太子因朝使
錄尚書事廢賈后於金墉兩黃門力耳華不從賈后
微聞遷卞雍州刺史卞乃服藥卒又按隋以大臣領
其職蘇孝慈自兵部尚書拜左衛率尚書如故又按

唐以李靖為中書令行左衛率轉兵部尚書

左右司禦率府

隋文帝置左右宗衛其官制如左右衛各掌以皇族侍衛煬帝後為左右武侍

率唐後為左右宗衛率府龍朔二年改為左右司禦衛後改衛為率府為副率二人長史錄事及倉兵曹參軍各一人

左右清道率府

隋有左右虞候各置開府一人唐開元初為清道率府各置率一人掌斥堠道

路先驅後殿伺察姦非副率二人長史錄事及倉兵曹參軍各一人

左右監門率府

隋左右監門率各置一人掌諸門禁煬帝改為監門將軍唐復為左右監門率

擬左右監門各置率一人掌門禁之籍副率二人長史錄事參軍及兵曹二曹參軍各一人

左右內率府

隋置左右率副率各一人掌領備身以上禁內侍衛供奉兵仗唐為左右內率府各

置率一人掌侍衛左右供奉兵仗副率長史錄事參軍及兵曹曹各一人千牛各十六人掌執細刀弓箭宿衛侍從備身各二十人掌宿衛侍從

旅賁中郎將

一人職如虎賁中郎將宋初置天子有虎賁習武訓也諸侯有旅賁禦災害也唐諸

率府初有中郎郎將官永徽元年以太子名忠改諸率府中郎將為旅賁郎將其郎將改為翊軍後或改或省


太孫官屬

唐永淳元年三月立皇孫重照為皇太孫將置府寮高宗召吏部郎中王方慶問曰前代

故事如何方慶進曰按周禮有嫡孫漢魏以來皇太子在亦不立太孫晉惠帝永寧元年立愍懷太子第三子襄陽王尚為皇太孫太子官屬即轉為太孫官屬南齊永明十年立文惠太子長子南郡王昭業為皇太孫便

居東宮今皇太子在而立太孫旁求載籍未有前例上曰自我作古可乎對曰五帝不相沿樂苟不失上下之序不虧政理之道亦何事而不可詩曰貽厥孫謀以燕翼子禮曰君子抱孫不抱子孫可以為王父尸以其昭穆同也今陛下肇建皇孫胤斯盛典所以彰子孫千億之盛福祚靈長之應也上悅使方慶詳求典故官屬員品乃奏太孫府置師傅及文學祭酒及長史曹掾主簿管記司錄以下六曹從事等官各加王府一級後上頗以為疑竟不補授而止

通志卷五十五



總校官庶吉士臣侍朝

校對官編修臣閔懌大

謄錄舉人臣嚴儀